

汪梅村先生集

汪梅村先生集卷十一

江甯汪士鐸

湖北荊門直隸州知州蔣君傳

道光二十年益陽胡文忠公典江南試得甘泉蔣君文而亟賞之取魁江蘇多士其後文忠總師湖北竟檄君參議幕府益賞其才之閒濟文忠薨新繁嚴公爲中丞仍辟君謀謨戎政且使出牧荊門州甫九月而君卒於官同治二年五月也余聞而哭之慟且言曰君故豪宕志意廣博常欲有以見於世旣參文忠軍事主餉糈文忠有所興革輒與君議之君亦感激知遇盡言無忌諱而事皆籌乎其大其它疏節所不恤矣方咸豐六年君始來楚其明年已告餉絀時給軍以錢二緡當銀一兩君曰湘楚各營月須銀二十四萬而所入地丁漕折鹽課關稅及新設

釐金牙帖才十四萬其不足者專倚秦晉巴蜀協濟然三省力難兼顧是必豫思自強之法今牙釐鹽局月可得錢十八萬緡倘比例市價易銀可得十二萬以較發給各營抵銀九萬者殊絕歲計可贏三十六萬惟製造火藥蓬帳器械船艦須錢三萬緡其前敵各營月放制錢已久者咸宜於拊循之中微示限制湘營月給錢二萬緡水師萬五千撫標一萬都將軍及湘後三營五千計月放錢八萬緡此外後路各營一律發銀則歲贏不啻十八九萬是亦自強之一術也九年春李忠武敗沒文忠墨經視師裁汰訓練士氣振新其舊制百人有哨官五哨有營官而帥之以一統領君曰統領與營官其階懸絕而營官與營官則權位醜夷夫力鈞則相輕分俸則相爭一旦緩急擇一營官將數營以出則它營心不能平權不能一而令有所不能行此

曩者三河旣失桐城所以不守也夫地方文吏上有督撫其次司道又次知府其下乃爲州縣爾位以漸升故威望以漸重蓋不能驟使儕伍懼伏也請簡營官之才具優氣魄大者命爲營總使轄數營以觀其略而受節制於大帥則名分旣有常尊事權卽可畫一偏裨有功名之奮統領無尾大之虞積小以成高大升之大象也文忠皆從之君又籌楚北邊防曰自光化抵廣濟無慮十餘縣千五百里壤與皖豫交錯今進勦留防並舉故兵不能減而數增餉不能節而數益沿邊險阨雖建碣卡然無人誰何亦資盜守而已夫兵所以卻敵而民團者所以助聲勢相輔車者也營兵旣恒弱不足恃分勇守之則征軍力薄吾能勿胡跋而尾蹙與前羅田所立禮中營聯絡鄉團身臂相使使諸縣倣之各立一營責令守碣挖濠與鄉團相友助月費厘萬

金卽可收屯軍陰平之效再使一營總總數營駐巴河以策應
安黃使提督策應襄鄖則我留防之軍不多而東征之力厚矣
文忠采其言增禮四營及英恭各營無何而湘營回援湖南遂
以新營番上前路邊防由是始虛君又謂京師天下根本儲
侍不容空匱請咨督伺某於淮北運河水次建倉購淮揚裡下
河之米備撥船出惠通北上以實通版而輔海運之所不及然
於吳楚異地且其時銅瓦廂河決東北貫曹鄆出汶上運道已
大壞不能議君之策矣十年春外省協餉已絕師益饑有獻議
稅民屋閒架者文忠斥之君請於鹽釐斤加二錢遂不勞而獲
錢百餘萬緡時楚師圍皖急君謂圖皖必兼圖廬州而圖廬必
以水師扼巢湖文忠皆然其策其餘若籌大局復淮鹽崇節儉
改硃卡諸議雖限於勢不能行而未嘗不嘖嘖稱道其才之大

且慮之周也文忠旣薨君失所倚益硜硜勵名檢恐負知己其
收荆門也守舊章而錢漕先完濬泉源而水利通鬻焚祆祠以
靖民志出倉穀以惠閭閻州人士歌誦之勿諠然設施未及終
而君已沒矣悲夫君諱照字文若以優貢生中式舉人厯官崇
陽蘄水知縣己未一爲湖北鄉試同考官游升今職卽補知府
春秋五十有九祖諱某某官父諱某某官皆以君貴 贈階朝
議大夫取顧氏 誥封恭人子應鵬國學生湖南候補知縣女
子子二適同邑某某以道之不通而斯州之民愛君之摯也留
君喪權厝於州之某鄉君事親孝兄弟四人君處二昆季弟閒
克讓無閒言家雖中落於鄉黨有恩誼交友能全始終韓體震
之令江夏也因公使負官錢將百萬九年秋韓以薨去其友環
視無敢代者君毅然請於文忠而代之不數月庶政畢舉韓累

亦盡釋君長嘯垂橐而歸其急人之急皆此類其爲同考官也能默識其人修已讀書所蘊蓄者旣而所得果知名士君可稱述如此比者頗夥而余特揭其爲文忠所嘉賞者以諗世之人論曰君才恢恢吐納百川豈特以言見然其建策匡時多蒙采錄所謂附驥尾而行益顯與夫虎依林而威盛桂居嶺而芬遠向使文忠爲宰相君爲侍從其謀畫當大被於天下而乃匱匱見之軍旅閒也固未足以見君之才已

葉金甫家傳

道光季年有以周易食於京師者葉君金甫方試春官練日而從之筮得泰之升曰吉是爲以其彙統升金甫喜或玩而憂之曰不然初九化六離體不成動而爲木居地之下棺之象也之子其不反乎且是卦也位於萃困之間泰反其類風始東南渙

汗之行而地隔之其爲不祥不厯之子也其年同鄉赴禮闈者
皆報罷咸豐三年金陵陷又十年爲同治癸亥而金甫卒於京
邸自是以來吾鄉之第進士者蓋鮮然則幾之動至微惟誠者
能感之通變者能審其時以權之無違占也金甫名庭鑾上元
人道光癸卯舉於鄉八試禮部五薦而卒不售然不屑以他途
進君事親孝父病求以身代安貧教授以母茹苦食常舍肉主
人知之遇佳饌輒饋兩器供君遺母也君撫弟妹友妻翁氏卒
君年甫二十有五遂不再取與人交敦篤無畦町雖非所好者
亦樂易不立崖岸不若余之隘也君病篤謂其弟庭鈺曰方今
之患在不誠非但學問也辟寇十餘年吾子姪皆廢學我死弟
其以誠教之誠實而未讀書勝於讀書而不誠實也遂卒時年
七十子天祐汪士鐸曰余與君及楊正輪大埧焦桃溪子元嘗

從荆溪任階平先生遊君爲文以冲和勝楊以才致焦以思力皆得盛名於一時道光戊戌秋壽陽相國督學江蘇君試稻人賦以南掌國貢嘉稻故實見賞於相國遂餼於庠未幾焦病卒乙卯楊亦卒至是而君又卒蓋余之知交盡矣閭井已荒老成漸蔑可悲也夫

殉烈兩女傳

長女淑蓮字子敬次女淑蘋字子平幼皆從余學於四子書外授以詩毛氏春秋傳左氏禮小戴記劉中壘列女傳司馬公通鑑及加減乘除術皆能略涉大義而長女於左氏傳次女於九尤深長女最好學尤嗜史傳余家藏書二萬六千餘卷於七略略備詞章外恣其涉獵女寢饋其中至忘櫛沐次女不逮也然諸女皆事余孝惟余言則聽自余母蘇太孺人暨其母先後

去世家無婢媼浣濯炊爨縫紉之事皆暨其三妹分司之嘗佐
余補李延壽南北史志表及通鑑地理攷正今地形攷草木長
女筆也余續取後歲謀食江淮間往來書疏會計率次女主之
諸女儉素能寒苦操作不事婦女塗澤惡習不信師巫釋道鬼
神無徵之言不知側佞巧詐浮薄之行皆余之言也長女適上
元庠生吳榮曾芟舟未踰月吳游鄴下明年卒於鄴女奉姑守
志楊秀清之亂女欲投水死其姑止之乃奉姑出亡匿淳化鎮
東徐塏村事姑不敢失禮咸豐六年五月十八日向帥營爲賊
攻破女聞亂卒投水死次女字范氏未嫁遭楊逆亂累自經繩
絕不死遂偕繼母居故臥陰溼地兩足盡瘡身木僵猶匍匐行
五里至長女所要以致命歸遂僵臥不食死時咸豐三年九月
十日也

論曰方城破時次女以其弟弃疾才五月宗祀所繫力勸其繼母不死舉程嬰公孫杵臼事時余爲道州賊擄置城外生死未知也及余歸結里人爲老民女抱保其弟甚至賊婦蒙姓者強其後母誦僞咒不從將笞之女怡然請代賊婦笞之五十而笞他婦不持咒者百時弃疾尙存也弃疾殤女遂死長女之姑鄒賢明人也嘗謂室人云姊女累求自盡吾憐而尼之曰設遇非禮吾與若偕亡無獨死也姊者金陵婦人相親重詞也而卒死於戲余無子首邱無日死無恨恨兩女藁葬不能省視爾長女瘞徐璫村塘側次女瘞城內虎踞關山全貞堂後門外封而不樹皆賊境內也

增紀

楊賊之亂里人段氏岳氏皆以幼女投水甕使死凌氏女長

矣倒投深水餓死望鶴岡井尸枕藉三四不知誰何氏四聖堂空屋有尸腐矣驗其足女也黑簪巷空屋瓦石中尸骨腐矣有小女子髻而比鄰錢氏女三姑四姑偕自經死凡余居前後數十家所知者也

種樗老人傳

種樗老人自忘其氏字似漢魏閒人憲種樗樗成林甚茂嘗一詣市貨之不售歸益種不輟居貧老億顧自少多忘年交與北海管幼安高密鄭康成汝南許慎南郡龐德公豫章陶潛范陽酈道元京兆杜佑吳陸德明洛陽賈公彥魯孔穎達往還最數東海徐陵南陽庾信亦嘗把臂稍閒輒與諸人議論樗林閒人笑其迂曲弗恤也遭時之亂諸人各辟地不相聞問老人遂寢忘之五季之末老人益聾瞽時人與言多不省老人言世亦不

省以是宋以來交遊絕少卒窮老以死其鄰曰余嘗聞老人言
蒼勁砢磊多節目厯寒燠不渝松柏也今茲培塿地弗宜礪琢
彤綠爲明堂清廟建章樓觀其小者爲舟車禮器之屬者杞梓
豫章也然必世適相需又有工師重而采之與所以施之用者
當其任否則無若與吾樗老於空山荒江之濱而弗妄斷小之
以嬰世患也其桃李棠棣之妖冶可憐與性不相類故不植植
亦必不蕃樗不才中爲薪造物無私雨露其長養與它材木同
石炭用多而天地山谷之氣必有窮戶吾薪獲厚直未可知焉
惜吾不及見之矣其諧如是悲夫老人之善自爲謀也

方仲堅墓誌銘

君氏方諱凝字仲堅徽州歙人也年十七補博士弟子擢藻華
春大音鏗夏父某善青烏術挈君遊江甯遂爲江甯人梁鴻高

懷出遊吳下宏微名士爰宅蘭風君淡於榮利恬於進取侍郎
程春海師君同學也吏部程也園君知己也是皆提攜文衡吹
噓寒素劍逢薛燭可號干將馬遇孫陽定登上駟而乃飄零書
劍落拓江湖彈冠可慶而裴回於桑野之閒解帶匪難而絕意
於汝墳之什君之高風其一端也君善於筆札精於書翰阮元
瑜之書記實冠當塗褚登善之法楷原本典午任城孫寄圃節
相邀掌書啟珥筆睢陽之臺曳履稷下之館葛龔作奏殊絕文
士之工正平爲書曲道主人之意然君有伯夷之清無申棠之
欲諸侯羔雁雖充於庭前上相貂蟬常輝於座右而胡威清節
每畏人知吳隱廉名不因泉染旣而贊皇去位天雄罷鎮君追
隨袁浦不異任安痛哭廣武幾同阮籍山陰平樾峯太守與君
最契君與之北至鍾吾南尋禹穴東渡滬瀆西過夜郎周回萬

餘里出入十餘年千金誰贈竟無好時之田片石同歸再見鬱
林之舫驚陳遵於四座不少憐才酬皇甫以千縑有誰好士衰
病交集襍被東旋厯佐王春綬太夫子及毓星浦崇雨舫陳蓮
史四方伯幕府府主數更日月無幾張奐名馬不入於廐中博
士瘦羊僅充於廚下工部欲拔之屋猶賃居人齊卿旣浣之衣
尙留質庫筋力告乏出無下澤之車齒髮已衰食祇脫粟之飯
炊爨下役惟有樵青酒漿中饋未聞絡秀君之介節於此見矣
識合龍蛇日悲鵬鳥三命有限二豎交棘時道光二十四年十
有二月也春秋六十孺人江甯張氏糟糠久厯荆布恆歡子光
屋出嗣伯氏女一適上元廩生徐蔭穀孫銘新尙幼光屋將以
明年祔君於君考之塋禮也君律已最嚴擇友最慎縞紵之贈
不乏使君杵臼之交惟餘下走橋元過車之約心識前盟伯旂

猶視之悲情慙復撫寢門一痛憶山陽思舊之銘貞石百年儼
中郎無媿之作爰踐宿諾以紀餘哀其辭曰

猗與蓮幕見此天民南琛孚尹東箭有筠鷄廉勵節馬磨傭身
八口仰屋五月負薪正草合度牒奏無倫鮮采翡翠彪炳鳳麟
與君結友廿載昏晨鄭君教授山公留賓厲壯武志知敬仲貧
城府全墮肝膽式親抱獨守默茹樸含真伯子意遠公瑾飲醕
曹倉不吝杜庫渠珍雙龍護久一鷗借頻菊花涼夕楊柳穠春
煙昏寺塔雪沒城闔雞豚饌熟鸚鵡杯陳沮溺有約元白結鄰
華年周甲妖夢在辰桃源無洞蒿里埋塵巨卿魂逝劉沼書新
裁總爲帳執綽下窰疇昔執友今成古人生金何日視此貞珉
湖南辰州府教授胡公墓誌銘

公氏胡諱達澍字甘園益陽十九里長岡村人也曾祖民典祖

多吉世秀儒風以行誼重鄉里考顯韶邑庠生孝弟敦篤邑人
敬之崇祀鄉賢祠著有紫筠園集公幼穎拔讀書數行俱下以
廩膳生舉嘉慶丁卯科鄉試試禮部累薦不售丙子充 宗室
教習官期滿引見奉 旨以知縣用公掉頭不屑亟投牒吏部
請改教職道光二年選授華容教諭華容左江右湖無邱陵之
限地窰下數患水君亦數捐廉奉以助振以故士紳愛留之不
使遷丙申丁繼母艱始歸里邑人延主龍州書院服闋補綏甯
教諭歲丙午升授辰州府教授未之任而公卒春秋六十有三
公事繼母孝處兄弟友待鄉閭誠而始終以學問誘導後學爲
事自爲諸生時以迄蒞官循循引掖談藝餘晷必舉古人微言
盛軌忠敬貞烈之行相勸勉聞其言者如飲醕醪啐焉飫焉醉
焉醒焉溫溫然適而不自知其湛之久而相與以深也宗室恩

尚書桂漢陽易明府學超城步張廣文廷彥華容熊明經方綬
綏甯□孝廉□□皆俊才敏異公爲剔廢髦澤儿翁飾翰翮卒
皆奮于天衢羽儀雲霄俛敷清時者公之教也公生於乾隆四
十九年甲寅卒於道光二十六年丙午著有遜訥齋稿配張夫
人淑慎勤儉子二長楓翼邑庠生咸豐紀元年以孝廉方正徵
嗣以軍興例爲荊州將軍綿洵保奏以教職用加同知銜今任
郴州訓導者也次杏翼國學生卒孫二之杰邑庠生之蒸業儒
曾孫學珪尙幼自公上至公之祖皆以從子林翼貴 誥贈光
祿大夫妣皆正一品太夫人初公少時與兄詹事公暨弟春藻
墨溪奉公考律臣公訓昕夕底厲追琢靡閒暑寒時有棣華競
爽之目卒皆學業成就爲世間人雖隱顯或異而學之益人固
有徵也銘曰

學以績身學以陶人學以昌後昆眎此貞珉

裴孺人閔氏墓誌銘

裴孺人者全椒教諭揚州閔忠叔之女太史洪桐生之義孫女而江西司空裴文達公之孫婦也世秀道風幼嫻陰訓纂組摶於稚質德教傳於女師年十八嬪福建連城知縣名煥字文軒者生三子一女以鐘鼎之華宰山水之邑鏡縣堂上琴諧室中而種柑之客累諫於叔平叟柴之風欲追於司直可謂貴而能貧儉以爲寶者矣旣而連城君以憂回里未導服而亦卒孺人時年未三十也上悲我特下撫藐孤而鬱林之石旣無成都之壁徒立遂於明年歸甯母氏期折蓼以示惠先掃室而借明修脯之饋十指不辭腥牢之甘每食弗御刀玉勗其饔錯俎豆習其嬉遊不以乾蔭之傾棄其門基之舊以母代父志益苦焉夫

何黃巾紛馳赤縣立潰虛機絲於老屋滿目秋焚尋燬舍於空
城一區茂草孺人提挈子女溯遊津湖夫子則夏屋未窆佳兒
則青箱莫繼望贅粟於新婦設醴何時哀讓棗於外孫與元已
渺天乎何罪憂能傷人遂以咸豐九年十一月病卒春秋五十
子相衡習醫相春以軍功保舉巡檢其一早殤女適儀徵吳慰
祖吳官湖北巡檢與子晤於鄂城持孺人事略諭子求銘因銘
之曰

烈爲陳矯忠迺狐篤婉婉孺人一身似續作嬪華門琴翕瑟睦
魚焜軒高鳳諧筵卜柳甌生塵花疊戴福發識占蛇啟舍集鵬
浮厝魂悲還家市哭餬口機紅課兒燈綠五校西來連城東覆
囊囊提攜淮湖洄瀟壻水並流姑塘遠矚女泣倉舒子從孫叔
千里哀鴻廿年寡鵠劫火朝燬征夫宵肅江右鳴珂淮南就木

何日何年穴同邦族

陝安兵備道上元何公墓誌銘

勒石既成改葬於牛首山麓

君氏何諱桂芬字新甫江蘇上元人也先世於明永樂中自安徽遷江甯本生昆弟五人而君其季性闊落浩浩有濟世志不屑計家人豐嗇以副貢生中式道光十五年順天舉人甲辰大挑一等籤分四川知縣不赴踰年成進士改庶吉士散館授編修三十年充會試同考官咸豐六年授湖廣道監察御史洊升刑科掌印給事中同治五年簡放陝安兵備道七年九月卒於官春秋六十有八明年柩始歸里十年十月卜葬君於龍山支麓韓林之原與胡恭人同穴禮也始君之在翰林也工爲文小楷韶秀至絕而不以驕人及爲言官時事孔棘同列爭伊優亞言萬不能行之策或觥斷一二細瑣以自見君所陳言

退輒削其藁雖子弟不得聞曰吾豈以此沽名歟以故人不能
知旣官漢中人以君爲書生也頗易之君則築堡寨召流亡靖
遊勇慎刑章麻麥甚殖雅片以荒用是擾兆民而保巖疆其勤
職若是惜未竟其施而遂卒然卒之後大吏惋悼婦孺垂泣追
送若喪其私親此豈強市之人而穫之與將直道之在人心愚
夫婦固怛然動於不能已也君所後從曾祖庠生諱膺若祖
諱恩考諱友蘭皆太學生皆 贈如君官妣皆 贈恭人胡恭
人蓋國子監學正本淵之女孫庠生大璋之女并曰縫紉一如
寒素佐君之廉者也不幸先君卒於京邸春秋五十有九子四
人惟存其次曰忠萬咸豐九年順天舉人辛未大挑一等不就
職今之奉君及胡恭人之柩以歸而葬之者也忠萬以子習知
君而請銘於子遂銘之曰

昌於文敏於政卒不吳民不病有天道有餘慶

誥贈武顯將軍周公墓誌銘

今天子親政之年周弗卿軍門踵門來請曰月之某日將改葬先子於某山之原并遷吾母之櫬祔焉請以銘幽之文屬之君君知吾先子者也其勿辭言未既涕泗洟瀾曰某不孝不克一日祿養吾親金陵之變某遠在湖湘閒不克從死爲國殤苟又使吾親魁梧之節遂并湮沒於泉壤某眞弗可爲子也已言已涕出不已子強誥之始去蓋子與軍門同里衙宅相離一二十武軍門幼從先處士游其家世行誼雖習知而子以爲貞石之文宜略諸細行而識其大謹按狀贈公諱國梁字岐興氏曰周祖某考某皆有隱德世爲江甯人粵逆之亂陸制軍惶懼以土堵城九門驅市人徒手登陴贈公與焉城旣陷淑配蔡孺人先

自盡其姪瘞之城墉贈公殊不顧猶踉蹌持竹竿出巷戰其戚某勸之去贈公仰天大呼曰嗟乎事一至此乎是固食毛踐土者之大恥也且吾旣與其役敗而去之是何異手人之城以授之人也遂歎跳出遇賊受重創僵地不知人其戚強負之出夜疾走至祿口鎮而踣則贈公已不知死何時矣遂殯於其山時年六十有九事聞 勅建專坊烏乎此軍門所謂大節者與然予觀贈公居里黨儒緩退讓若不能言至急人急則毅然奮發不私計事之利鈍艱巨而甘赴之若其耆欲宜其捐軀蹈義之弗自卹也同治八年

天子以軍門保障襄沔功 贈公階武顯將軍 贈蔡孺人曰夫人子有全卽軍門也其乞銘也予方從事采訪忠義局故爲求諸公牘而徵之且系以銘曰

三軍之謨未與謀也退殉於衢若私讐也槩木遠壙諗千秋也
雲油谷瀆宜公侯也

通政使司通政使貴溪朱公墓表

君子之事君也務引其君以當道志於仁而已當咸豐中海內
多故非上有失政下有貪酷也人滿而天槩之俗奢相耀而物
力不能給亂民乘間陸梁邊徼山澤之阻非有大志也一二師
武臣專閫縱之過嶺寇始熾是時

文宗皇帝虛已求言上封事者月數十百其巧宦則椎拍觔斷
取露頭角而一二知能之士又吹毛索般剝剔切劘操之蹙如
束溼薪欲以此捄弊是舟已漏而刻之益其穿病在支體粗工
治之始痺且勉宜進參耆以固本不當復投峻劑以亡陽也貴
溪朱公爲御史其知之矣咸豐九年冬天示炕陽公獨疏謂求

治太銳除弊太急請本慈祥以修人事

文宗皇帝爲之寬囹圄減流徒釋輕繫埋骹骼振貧乏推廣先王仁民之政以召和氣公爲御史三年疏無慮十餘上而庶獄得清衛士有恤紳民之殉難有以旌直省逋賦得以免兢兢然以歸君恩培元氣爲先務至於上關 聖德外及臺場彈劾薦剡章多留中公雖愼密不語人人亦信其無險頗谿刻之心也視世之矯激詭隨者其得失孰多噫如公者可不謂之君子歟

誥授通議大夫 例晉資政大夫公之階也通政使司通政使署刑部右侍郎公之見官也由道光二十四年進士 授庶吉士旋丁內外艱三十年補散館改刑部主事咸豐三年補江蘇司主事五年升員外八年升郎中九年秋補御史同治元年秋 授鴻臚寺少卿通政司參議二年 擢太常寺少卿大理

寺少卿三年 擢太常寺卿五月 授今職公之歷官也道光
丁酉爲選拔貢生咸豐三年保送軍機七年保送御史十一年
京察一等以道府用同治元年保送京卿兩遇 山陵禮成各
加隨帶一級公之遇知也在刑部而歷充 上諭館方略館秋
審處補軍機章京在御史而掌道巡視北城在通政而稽察右
翼宗學山東鄉試正考官前後六爲監試官再爲稽查倉官磨
勘試卷官他若文場之巡察接談換卷之稽察搜檢監察驗看
之屬歲皆有之公不事操切而事理亦就此公之差遣也公本
貫婺源宋建炎中始遷涇之東鄉遂世爲涇人公生於嘉慶十
七年少時省親章門以族人有貫貴溪者乃爲貴溪人補學官
弟子員食廩於庠既躋清貴心念寇亂後先世尙厝淺土毅然
請開缺回籍修墓而皖南兵燹甫脫沴氣充塞公年已五十五

歸涇才數月悲感染疫遂薨於寓同治五年九月也此公之生
卒也公氏朱諱夢元字貞起又字景唐曾祖諱安謙祖諱平泮
考諱一昂並有隱德皆以公貴 贈如公官妣皆 贈夫人娶
葉夫人簪室王安人皆於公補鴻臚少卿之年卒公遠鑒於吉
甫閔子竟不再取亦無侍勝三子長琛同治十年進士庶吉士
次琪季琇皆業儒女子子一皆王安人出孫二人大林大年皆
幼此公之世也余性不熹深刻故人予歸自京師道公爲御史
時時事孔棘官是職者奮拳搏袖面如削瓜獨公被服儒素恂
恂一出於仁恕人不知爲驄馬也今長君小唐太史持公狀來
謁余文余喜前聞之不誣也因揭公器識之大者俾樹於墓門
直隸候補道王公墓誌銘

代涂中丞

自姚江興而聚徒講學之風扇其魯人徒談性命辯理氣門戶

標榜無補世用有眞儒出迺灼然於天之畀我者與當時之所急而竭吾力以維持其際其上與下始深信其不欺則吾師惺齋先生其人也先生氏王原諱立人南陽內鄉人幼從塾師王香峯研究傳注之旨弱冠領道光五年鄉薦出桐城姚東之之門姚固多藏書召先生入署讀之由是飫聞所欲聞繼與相國倭文端公宗伯李文清公少司寇竹如吳公暨陳心一丁彥儔諸君子切劘風議益洞澈於天人內外體用之本在於吾心因改今諱曰檢心而心審在能容故字曰子涵乙未大挑一等發江蘇以知縣用旋丁龐太淑人艱喪葬盡禮庚子始至省試用其冬放粥上元先生丑正詣廠槩米眎黉班男女懲吏役邦用不增民惠以溥上游以是知爲非常人矣二十二年署興化當是時海氛不靖縣雖辟左而俗汰先生防內訌則簡勇丁祈有

年則禱甘雨禁枯喪則引禮經徠學徒則籌膏火俗用丕變暇則修志葺城重訂學規皆本實心爲劈畫去之日士民送者塞涂術陳方伯繼昌亟稱爲得民心焉明年秋闈後署句容又明年闈後署高淳先生禁諸淫祀以高碗會積貲創建義學義倉各百餘所捐廉奉修邑南永濟橋經紀周詳可持以久徐方伯廣緒徐太守青照又亟稱其實惠在民焉二十七年調儀徵先生設牛痘慈幼紡織蠶桑諸局修文廟付舞除老河影壞舵之惑民聽者振江都冬青舖河決饑民之衣食藥櫬收耕牛之在災區者經理未已以外艱去上憲挽留堅不可其年金陵大水民愈思之咸豐二年服除來省陸制軍建瀛委赴豐工時決口未合災黎彌野公私束手先生先禽捻首皇甫吉而弭強橫徐稽戶書之振災者而蘇閭閻雪王張氏之污而表眞烈節省漕

米萬餘石遂於次年正月台龍其年六月調署銅山練勇修城
以防守殲匪犯斬擒目一如在豐時五年奉 旨以同知直隸
州卽補旋奉部文以陝西知府用六年卸銅山篆將引 見時
豐工已再決幸自銅瓦廂北徙故十月復使先生往勘其老稚
聞先生復來扶持相迎有泣下者其感人如此七年引 見奉
旨改發直隸以道員用以徐州守城功 予花翎譚制軍廷
襄委查保甲以清盜源散囤積以平糶糴歷黎陽大伾以拯其
魚省糜費以收實效先生嘗曰弊端安能淨惟勤查細訪庶有
所察覺耳夫冒濫之在災民可也胥吏中飽不可也至我漫不
省錄則大不可故制軍以任事實心許之然先生已積勞受溼
乞假歸田矣其後嚴中丞樹森李尙書棠階皆以勤政愛民薦
卒不起同治紀元敍團練功加按察使銜是年皖匪擾內鄉有

欲與之賄和者先生力斥之而嚴守備賊不得逞竟遁去先生
獲上原於孚民而愛民本諸學道道非虛器也必講去其近似
刮磨其私與欲非二氏靜寂無爲遺棄世故也故先生雖勤講
學而不流於禪先生嘗拈居處恭三言以示人謂燕居必衣冠
行政必勤慎待人必忠信其在準提庵薦福寺菊潭書院內鄉
義塾孜孜善誘率不外此而不涉高深元妙之談教子弟以小
學亦期以孝弟而不語以達天在里建宗祠植松柏祭田義學
義冢義渡悉本文公家禮折衷時宜而無迂迴難行之舉此先
生講學實際也晚營別墅寶塔山以養疾八年五月忽病中滿
卒春秋六十有五學徒嚮哭如其私喪遽於十月葬公於其山
新塋越七年至光緒二年奉 旨祀公於鄉賢又一年德配郭
淑人卒葬於縣南盆窰先生爲明太僕寺卿儼之後高祖令善

曾祖建元皆隱遁不仕祖增生杞楠父廩生延壽皆以先生貴
贈如其官子五人之濬之沂之城之沆之江女一孫男九人
曾孫男五人皆業儒先生在江南癸卯甲辰兩分校秋試得士
稱盛卽不學若宗瀛亦辱與門牆焉先生著有易經說約春秋
本義孝經本義四書存真禮傳合鈔等二十餘種又刊姚公伯
山全集香峯文鈔以行世烏乎先生可謂真儒矣體用一原張
弛異地胥奉方寸爲嚴師一時名臣倚重羣黎感德至今日無
異詞非真有道德焉能淪浹於人若是乎倉龍戊寅去先生之
卒己九年公子之濬等來請墓刻計同門存者無幾矣因不敢
辭而爲之銘曰

學期濟物非徒言詮翳聖之用人情爲田孰寬而粟孰猛以虔
運於天君我執厥權叔世學徒高談性命安肆日媮處事弗敬

自信過深迺施於政民謾以怨妄期作聖先生英英旣勤且明
戴星問俗彎月修城弦歌弗輟倉庾載盈人飾於兒我感以誠
江淮之民思公道化憩息棠陰淒然淚下我慚負牆弊於十駕
欲贊不能昔有游夏

大理寺卿李公墓誌銘

天之期吾儒也厚矣運厄陽九其謀帷幄率熊羆顯畀以戡亂
之權者皆儒臣若修其學業講明繩己濟物之術而待後王之
用是爲師儒師儒者吾見之於臨川李公公諱聯琇字季瑩一
字小湖系出自唐太宗子曹恭王明其後王皋建中中節度江
西有大功子孫家焉至宋有監大軍倉諱居信者始遷撫之臨
川 國朝有以鹽筴起家桂林諱宜民者公會祖也監生諱秉
仁者公之祖刑部郎中諱秉禮者公本生祖也後皆 贈光祿

大夫妣皆 封一品夫人工部左侍郎有大名世所稱春湖先生諱宗瀚者公之考事具 國史 封一品夫人朱氏者公之妣以公貴 贈太夫人漆氏者公所生母也公昆弟八人伯聯璧仲聯珂以舉人仕中書叔聯璣伯叔皆以公官翰林時 贈如其官公其季也餘皆殤公生於桂林五歲始返臨川性清峻恥苟同年十二侍郎見背甫導服漆太夫人又卒哀慕危苦境非人所堪發憤淬厲背人夜誦倦輒自爪面繫髮坐後使不得隱几初爲文才氣瀟博及從鄧夢舟先生游益沈酣箋注講義名大家爲文軌轍自關雎町攄其心所獨得嘗爲歲寒章文錢唐許公乃普歎賞之以國學生中式道光二十年舉人旋丁太夫人艱服闋考取覺羅官教習二十五年成進士改庶吉士散館 授編修咸豐二年大考翰詹

文宗擢置一等一名補侍講學士明年轉侍讀學士充會試同
考官署國子監祭酒隨階歷充 國史 實錄兩館協修纂修
總校內閣批本 咸安宮總裁扈 蹕祇謁 東陵稽查右翼
宗學 日講起居注官加隨帶五級是年秋 簡放福建學政
其時粵逆據金陵賊徒四竄一二師武臣未能拯阽危奏膚功
也公急時要不爲迂談故風忠節則請崇祀陸忠烈公秀夫於
兩廡綏地方則疏請熊守謙舒化民等諸人主鄉園詞知充沂
曹捻匪萌芽則請巡撫督兵速勦薦知縣黃良楷顓辦緝捕慎
海疆則請沿海弁員奉調者本缺迅速署人裕軍餉則節次捐
廉奉數千金請停放京官三年春季奉銀裁軍需海運各局冗
員四年至福建搜采落卷多所甄拔斥泉州童之賄屬者風氣
爲一變其年擢大理寺卿五年調江蘇學政留審朱璐控案蓋

公清忠之忱 天眷久注駿駿乎鄉用矣六年之官江蘇其勤
慎一如閭然是時髮捻糾結苗回鷓張外洋乘瑕蹈郅公感憤
憂虞念非有威望握欽符者不能肅靖大局書生無補世用也
八年任滿會陳炯進棘遂請開缺髮逆東竄辟地通州川港困
屯甚於未遇時或請主師山書院公侃侃持正不肯貶道求悅
燔肉雖微舉比勇徹閉門掃軌辟脂若浼不受無處之饋不詣
要人門擇交矜慎不矯矯不翕翕而貞素誠慤見者心折惟以
祿不逮養佩噫霜露旣而曾文正公延主鍾山惜陰兩講席賓
禮殷摯維亂後簪笈請業者投卷踰千百公評隲自昧爽至丙
夜裁狂成猥靡怠寒暑侍坐之士奉公身教爲圭臬參倚忠篤
不少踐故一時氣節文翰巍爲世冠其造就品類昌學術十四
年如一日爲廬抱經姚姬傳以來諸儒所不及公之卒人士悲

悼若失親愛既奉公粟主祀諸講舍又哀其學行之大者籲請
督憲沈公葆楨具奏奉 旨果宣付史館入儒林傳烏乎公官
儒官言儒言行儒行非天始終欲公以儒報 國與除在史館
時分纂

宣宗實錄外雖學綜漢宋然摛抑不欲以末技眎人及門諸子
蒐輯編爲好雲樓初集二集采風劄記治忘日錄臨川荅問纂
訂崇明縣志師山詩存各若干卷公生於嘉慶二十五年十二
月八日卒於光緒四年正月八日春秋五十有九配趙淑人山
西候補知府秉襄之女 誥贈夫人先公三十年卒繼室錢淑
人烏程庠生孚威之女 誥封夫人簪室桂韓吳三孺人子翊
煌同治十二年舉人孫二世釗世圖皆幼翊煌卜以某年月日
葬公於某原謂予辱與公友言必不誣公來請銘予惟自太史

公於名臣外勅傳儒林上述孔子游夏下逮經師淵源派別率有廉節不負所學其誼至美善他雖銘鼎旌常猶不得與於是其與於是者必隆於學而大裨於教化修身厲俗俾後生有所統壹如公者無媿儒者矣迺不辭而爲之銘曰

昔曹成王澤瀾江黃輪舟敵器爲猗蘭光監倉真居司空始張篤慶在公畫衮黼裳釋祁嬭典威鳳翱翔

帝顧而熙拔冠玉堂作朕耳目斗牛女旁是富元璣汝衡汝量俗學速化唯唯無詒千女同兒萬牛一榻膺擅燥螻神用不辭公訓爲文左右攘礫必抽單微幽窆載學薦其肥腩與其膺腊本此吟睨剽剽舌咋調我簫勺聲滿鹹瀉番番元侯爲士求師值公引退纁璧禮之江東千里聞韶恨遲薈茶厭傑雕璞暴絲山頽哲萎輟業興悲餘姚桐城儒林魁耆公參其閒前光後儀

輝絃橫舍俎豆攸宜

戶部主事胡先生墓志銘

唯胡氏代有令問光於圖牒宋大觀中有待制曰舜陟者著論
語義良子曰仔著孔子編年廿傳而至 國朝曰廷璣著周易
凡見厥子曰清憲先生曾祖也祖曰匡衷著儀禮釋官周官井
田諸書最夥其子秉欽先生考也先生涵濡先澤淵源耆俊重
之以博聞篤志閱數十年成儀禮正義凡四十卷上推周公孔
子子夏垂教之旨發明鄭君賈氏得失旁逮鴻儒經生之所議
張皇幽渺闡揚聖緒二千餘歲絕學也又有燕寢考研六室文
鈔所以扶翼正義者也惟先生自高祖以來世傳經術道崇位
卑先生雖從政農部而奸蠹布濩未竟厥施名臣碩輔延主舉
比鍾山惜陰士飫其教講舍百數十人服膺歸仁拳拳弗忘士

鐸不才亦蒙揄拂蓋門無棄材焉先生諱培顰字載屏一字竹村績溪縣城人嘉慶己卯進士內閣中書戶部廣東司主事取許氏生子肇潢繼室李氏生子肇溥皆庠生亦皆卒側室徐氏孫人先生卒於道光二十九年七月春秋六十有八徽俗重青烏之說故未葬而浮厝於邑東門外先農壇之後先生居鄉創立東山書院於今存焉邑人感之所著書已刊行先生固不朽矣然世之嗜經術思明德者欽式遺教不可無以觀之也故因先生從弟子繼之請而志之且銘之曰

禮有端緒著於威儀探原揚瀾厥爲大師明明先生補而疏之廣之附之或稷耨之橫舍其昌士禮有光潤以文學報以馨香澤留東山道著竹帛惜此高原尙非幽宅

何子清別傳

元緒六年五月戊辰朔何子清下第南歸抵滬上蹈吳淞江死一時卿士大夫寓公之賢者及邦人咸驚悼慨歎發其苟得所留書別家人者乃知由某某也蓋子清爲校官宿遷例治鍾吾書院院有司事與其令比校牟院所入院生徒惴然攻之子清以戒某某謂子清刺其陰事嫌之次骨譖於令令庇某爲言之學使者學使即使令按之後雖得直然子清鬱結不勝矣又不第當回任故進退次且而出於此云子清爲人婣婣剛直喜自遂近古之言緇衣巷伯者予悲子清又懼楊氏所窮譖人之禍也故記之子清氏何名忠萬上元人陝安道桂芬子也以咸豐九年舉人爲校官職無細不舉年四十無子妻死不再娶亦無妾侍或問之曰取必少艾彼氣方盈吾氣已竭如之何其能卻欲如此嘗見舉於沈文肅公及林公天齡而獨見憎於某某

其是非不難辨也

梅村曰甲訟乙不詰事理之虛實即使甲治乙官某所不問人地之宜否卽當終於某吏之法也予謂子清不死於某某而死於法也嗚乎吏患不奉法耳奉法尤患不察其當否哉光緒六年十二月

汪梅村先生集卷十二

文十二

江甯汪士鐸

先考妣述

先考諱天下國家可均之均字治平歙之潛口人自先曾祖以

甯公

諱維周之楨之楨

始遷江甯以貴雄於時先祖蒼臨公

諱照臨下土之照

時家中落又牽家產涉訟事至十七年乃結案中閒爲訟師吏

役所欺詐店友所乾沒追繳庫本各款所賠累遂不能支而與

先伯父厚菴公

諱坤厚載物之坤

及先考析居三處先考好儒書於五

經近思錄尤篤能背誦其文又好楊園先生集平生不爲詞章

不應試儉以持己恕以御物雖至窮約而嘗怡然自得無喜愠

之色客授四郊束脩之入才三萬錢又迎先祖考妣來居益困

苦然每自館歸定省外輒與先妣蘇太孺人淪茗著棋蕭然忘

其廚之無米也嘗訓士鐸曰窮而在下須記餓死事小四字惡
衣食乃分內事何恥之有故忍饑誦經除束脩外不貸一子錢
雖口無充食身無完衣親族之溫飽者元旦外不履其門或斂
扉而假以泉刀怡然卻之而果毅之氣人不能強棄養於道光
十二年壬辰六月二十五日春秋六十有八先妣蘇太孺人與
先考同庚外大父榕菴先生諱紹祖博雅耆詩歌蓄書畫甚富先
妣性嚴肅面無情容外大父教女廛識文字曰詩非女子所宜
學也以故與先考甚合惟寬嚴異施戚黨後輩皆樂先考之平
易而憚先妣之正直士鐸之幼先考館於外先妣日取二十四
孝日記故事幼學須知諸書講授之使勤誦習稍長教以四聲
對偶之學家極窘困無僕婢凡浣濯中饋悉躬親暇絡經取備
以佐不給暑日飮餲臭猶食以癯饑冬則絡牀風痠手膚裂若

碎盜而不能息至士鐸取婦後始獲息肩然自癸酉至庚辰其
況瘁勤劬殆非中人所能堪者此士鐸所最痛心而不忍一涉
想者也烏乎奈之何哉

自述

士鐸家極貧然性好讀書先君子好理學除程朱經注之外禁
勿觀日以無入不自得爲訓故視戚族之溫飽美衣食爲餘事
然蒙師皆不踰閭巷雖歲一易率無所講授年十一從徐先生
諱銘游始覩考試帖括之書乙亥冬館災於火明年益貧不能從
師其夏學故衣於焦氏才六月其肆歇業又明年復學其業朱
惠泉姑丈宅亦只五月其肆再開而歸歸則無聊賴之甚先君
子館孝陵衛月一歸定省先大母暇則煮茗與先慈奕棋而勸
余以習楷書而已未嘗一語憂飢寒及詣戚黨也戊寅五月改

習饒餅業於長千里

店曰祥和

其東人萬姓燕人也謂余日子非商

賈中人也奚不歸讀書耶遂於八月又歸歸則刺譏之言擲掄

之狀殆鄉里族黨中周徧以為不才矣於是取四子書溫習之

中表吳春卿茂才

杰

為略解說乃習為制藝已卯七月求考於

鳳池書院邑令某極賞之

題為從義崇德也

時先大父卒已久舅氏聿

文先生習綴業不好書外大父榕菴先生所藏書束之高閣四

舅氏振聲先生耆繪事存其二十之一於齋中余時時竊觀之

大母矜倪太孺人賢之或舉以贈庚辰八月以能讀書入泮督

學使者姚文僖公

諱文田字秋農浙之歸安人首題為未信則以為謗已也次題河漢余首藝用韓非屈原

作正面以伯夷賈誼作陪面以陳東歐陽澈李綱趙鼎作反面

次藝力言嘉陵江非漢西域非河源嶠冢昆侖班鄴之言非是由是人爭

覓余文矣深加歎賞然亦惜其文法未合外舅宗錦城先生嘉

之以南陽君字余辛巳壬午疊膺房薦

湯文端公金釗謂其有大醇亦多小疵由洗伐

之功未至徐惺齋侍郎士葵謂其亦自按弦拂節借詞旨尙薄耳

乙酉以經文章率房師擯之

丁亥冬南陽君來歸君性木強鮮言笑不加修飾先君子喜之先慈雖惜其太朴素然亦喜其能聽教言也江甯之俗新婦入門有所謂煖房者用魚肉將之中表朱鄴水華茂才輩知余意皆以書代之如墨池編廣輿記之屬皆是也時見佳書則私典南陽君嫁衣釵釧之屬以市之而屬其勿言南陽君亦喜余讀書嘗冬夜一燈憑矮几作針黹於牀前余無絮裯坐牀上牛衣中頰而觀書率夜漏三下始寢蓋余性剛拙而南陽君能安貧勤操作於堂上極婉順敬慎之真而於余二十年無一語反目雖或小不加以理亦淡然置之無違言他人雖其兄弟無一字假借也乙酉余始食廩餼南陽君旣歸謂余勿爭泉刀貽上不美名故余不與人爭利先考聞而喜之曰是能守吾道者也

連舉五女一無服殤子坐是病瘵日以婞直家雖漸裕於昔而念遣嫁諸女遂不能市藥醫之此余之深悔也已酉冬始以無子續取吳興君始製珍衣裘始役一老嫗始能具飲饌遣嫁兩女始連舉二子雖下殤與而先考妣及南陽君皆不及知矣

祭胡文忠公文

於虜運隄九六蕃狼虎豺南戒充塞及軒轅臺吳越魚爛黔蜀朽摧赫赫荆楚實天地街蚩尤三陷化爲劫灰嵩洛否閼閩粵塵霾天佑有清篤生魁材忠孝文武披草芟萊桓桓夫子起於資水韋業經承孔庭詩美玉堂揆華禮闈校士持衡江淮擢拔杞梓分符牂柯前除瘡痍黎平停桴台拱徹壘大府畏儒曰姑緩止隨會不用遂長奸宄江漢滔滔寇盜蟻屯沙羨夏口犄角爲援中旨詔公進討鄂垣龍虎左右風雲吐吞長塹四周

取之於樊武漢築觀斬黃祭門尉畢捕雀百不一存坤夷乾清
二曜燁燁公籌平賊首需餽饟生財維民以撫以養貪殘黜伏
廉能嘉獎沙汰侵漁豐裕軍帑昔輸脯鍾今以缶盎昔輸束正
今以尋丈奔走歡呼若聲有響我儲旣盈我臺宜廣子嚮要經
志靖風塵用賢則伯無競維人廉川分潤靈嶽效珍金臺屹屹
集庸萃鱗投袂誓師之析木津魏絳云咏迺罷兩甄指撝組練
于郊于閭濤霍司空矢石躬親師老則鈍餉久則絕猾寇乘虛
十萬浴鐵猛士何存司會告闕公日憂憤伊轡鬱結民命吾命
民血吾血張口噴薄滿帳紅雪扁盧徒勞弓劍又折投地呼
天臣衷彌熱旣克復成功弗居戎旃賁惕休豫弗渝地維累
坼能指其虛江河日下能執其樞何繕厥郭匪康而徂臣力已
竭誰弼不圖臣死其分誰共憂虞驂尾儼箕從帝必都於庠哀

哉吾徒巾褐孰冠帶我吾徒圭華孰崇閎我吾徒狂狷孰裁抑
我吾徒樗散孰容畜我我瞻四方何適而可性剛才拙逢時輒
左古有心喪墨隨淚墮哀我人斯重罹茲禍烏乎哀哉才俊鵬
騫公誠感之狂盜鴟張公氣吞之公之忠誠

先帝鑒之公之恩澤下民尸之其訓吾徒義不勝慈酌酒一樽
默維已私疇昔几席今成山邱百歲匪遙褰裳相追烏乎哀哉
尙饗

祭胡文忠公文代

維咸豐十有一年八月壬午太子少保頭品頂戴湖北巡撫胡
公薨於位烏乎哀哉四方多難實賴宗公昊天不惠降此鞠凶
更失師表民祝國功自上袞星使暨百執事外而元戎上將暨
千夫長百夫長奔走哀悼若其私戚閭閻耕販垂白戴髦士女

之倫罔不社之稷之春相廢業烏乎哀哉以公功德鴻偉豐渥始克稱此固非可美言權執襲而取之也公之勳在鼎鐘事在史氏嘉言逸軌亦有私家記纂皆不敢及記曰在官言官敬銘農部郎官誤蒙辟署裁及二年遽承驅策謹以聞見測公憂國公忠之懷以製斯誄其辭曰

昔在炎黃補蚩作厲相佐闕佚罔紀金幣秦鄭道渠漢鄧司契元味分鎮厥有會計宰臣賢勞惜不並世洸洸楚師基于湘澨濟江漢淮爾艾累歲恃茲泉穀操縱其際維此泉穀楚民膏脂裕大豐亨權輿在茲公持管鑰履盛思衰馬步蒼兕匪刻匪糜籌立成憲俾足規隨農商鹽鹽始末相資廉者用褻而侈必褫其舉至公而黜厥私產有盈縮歲有穰毀鉤觚平衡皆而不哆仁窮而術義精權起眾譽不撓羣疑不止目營萬彙聽之美訾

鴻纖功罪身肩不倚軍雷實惠

帝錫元祉大星宵燿憂在後死烏乎哀哉疇昔郎署已窘匪頒
今茲軍府又值時艱仰恃宗臣爲陵爲山望雲興慕投版思還
感公忠義遂忘懦頑蛇虺猶在 龍髯已攀出納之率日絀千
鍰清醑告絮涕出潛潛烏乎哀哉

祭曾文正文

維同治十一年二月戊午兩江總督湘鄉侯相薨於位士民哀
悼若喪私親樊然述德歌相俱廢某等不佞辱爲知愛廁諸賓
友之末以謂公之碩德偉烈著於史氏其文章緒論耆俊皆能
記纂獨其前後論建胥本以人事君之忠非身受其閭澤者不
能言之翔實無遺也因本見聞所及而增於騶虞之誼云
元黃滲黷八柱繫只精氣沕穆賴日星只岱嶽高深壤涓盈只

位職何在在舉能只皋夔啟沃元凱升只勳華畝聖繇壽成只
讚禮講德御邇英只先後前武陳道則只禹湯躋敬正四國只
閎綱細目備繩墨只求賢審官輔至德只經駱越谿岡播羶腥
只沿湘達江踞邑城只峻嶇潰敗天方醒只說士至漿屠櫓槍
平只平綢繆桑土先民程只善紅女春蠶蠶農春耕只勸黍稷
稻粱荒不驚只穀榮發秉穗完其貞只土四民忘亡惠淵淳只
文武驩虞肅典型只惟敷仄陋贊

帝廷只滌蕩其污穢還泰清只搜儲翹秀廣無界只百寶騰躍
露光怪只筆舌曉鬯等颺拜只摺擾畜六夷圖王會只通三司
百城荷冠蓋只保芻茭餉糈善計會只糧發蹤指喉決勝敗只
營縉脂豪杰建旌旆只營關弓矯矢課殿最只武月質成誠信
嚴申誠只發牆壁宮僚勘所居只保八校討捕探丸戒只城律

學討論吏無害只

吏治

良治灌辟精器械只

軍械

召徠輸墨合中外

只

洋

鉤觚舟車算刀貝只

釐金

疏鑿岡阜濬溝澮只

開河

杞梓瓊璧

逮殿詹只

工料

祠宇市廛後官廨只

工程

杵石範土若圖繪只

琉璃

密

補苴創制成大快只疇祉戢盍卦占泰只武功崔巍啟文昌只

戴弁執豆朝上庠只

文廟

翬羽翬鼓儺而張只

雅樂

纁帛璧玉聘俊

民只

院長

持衡較藝采蘭茝只

書院

爲求老屋及大航只

求遺書

剛柔

經史闢書倉只

借書

宋元槧刊精以詳只

書局

表彰忠烈姓氏芳只

發凡起例網在綱只

忠義

登崇儒父及老蒼只棠桷枌栢棧棟梁

只樗散如某備列行只大匠所顧獻明堂只鼈足東斷復何望

只亂曰謬乎慄卹然失悲憂窮蹙合萬室嬰失母兮士之殊俗

辭親暱民謂蒼穹兮胡不仁甫離鷺粟涉青春奪我乳哺存其

身揮涕西望湘水濱烏乎哀哉尙饗

代江甯士民公祭曾文正公文

嗚乎公平禍亂降福江淮曾不數年移蔭金臺公在畿輔民望
公回每逢北客問訊徘徊飲食必祝恐公不來節鉞南返歡迎
如雷謂軍有司命官有表儀吾民有乳哺士有所師富者益市
酒肉相娛樂貧者自以爲可以得粥糜非公能家賜而人給之
也而人心堅定皆恃公在以爲可安而不危何圖元老天不憖
遺然使無桀鷺之伏莽無腥臊之島夷河運無郛城之潰決軍
民無仰哺之隱私則台星宵圻雖民無與芘蔭國無與卜疑而
制度謹節蕭規曹隨凡百君子尙可以勉爲支持無如傷弓悻
羽聞弦神疲謂公之在鎮澹然無爲卽夕一卷晨一棋延嘉客
話詩古文辭而天地民物之蕃變吉凶同患之大規威稜勝算
入人心脾如江河浸灌岱華厘屢默有以銷邪僻之志慮而變

化於人所不知今於窺園俄頃無疾騎箕既未垂士紳之法誠將何以解吾民之憂思公之仁兮公之誠兮乃忍使吾民瞻顧垂涕爲失慈母之嬰兒哉烏乎哀哉尙饗

祭莫子偲文

邇矣牂柯風雲莽蒼篤生君子溫文無雙踴躍九鳳引吭朝陽一鳳高翥音中歸昌志學之始曳衿上庠哲匠校藝五物舉鄉董賈雖才命不公卿班荆贈縞并時儔良歸擁皋比敷教烏江琢玉于璞俾爲珪璋湛絲于秬俾成朱黃彼暨之士壹意景行載贊銓部載辭不狼潢池扇波日月韜光九二之見于田于京瞻烏所止隨雁南翔桓桓相公載旆荆揚旣克皖城三吳允荒東采杞梓南掇蘭茝遂登龍門鼓瑟承筐惟君於詩邁宋規唐如五丁斧鑿險磅礴如七襄機織錦縹緗洗箏琵琶奏匏竹簧

惟君於書奴隸王羊以東都朴發北朝光顏柳謝質虞蔣亢衡
碑版之餘箕胃聚張惟君緝雅于黔之邦山川能說故實以詳
女悲士嗜幽聞微彰明三百年不湮風霜惟君訪古搨墨蕭梁
蒲颺竹筍吳楚徐方賢侯倒屣勝流傾觴求書海陵忽殲高明
桐君有藥海客無香寒鐙孤艇略槻微裳煙埋筆冢風冷詩囊
邵亭云逸魂返塗長石頭巍巍迎擔泱泱今月舊雨從君常祥
乘風化鶴歆此椒漿烏乎哀哉尙饗

祭鍾山龍神文

代

鎮撫兆庶首重祈年霽霖霑足有開自天歲在強梧雨澤屢愆
以社以方徧於山川我犧旣碩我祀孔虔我祝致告旱魃仍瘳
惟茲鍾阜龍神赫燁上格九穹下徹重泉有滄興雲東陌南阡
四禱四應馨此吉蠲緇耦黛耜耘耔甫田黍稷稻粱倉箱萬千

敬惟明德仁惠蟬聯鳩工庀材作廟翼然背負翠巘俯瞰靈淵
在昔蕭梁朱公安禪神性冥契亦儒亦元入風出霆神衛姬娟
咬椒啗桂神享辯孺時雨時暘神德周宣如坻如京神力狝連
上琴下簫鐘鏗鼓鼙神來娛娛非霞非煙福我江表甘澍連縣
尙饗

弔采薇子文

采薇子不知何許人順治間黃冠草履來績溪八都無家室結
茅西山阿茹山草飲山澗明年或延爲童子師作擘窠字縱橫
有法度康熙某年卒卽葬於其舍北有好事者題曰采薇子之
墓子館此鄉見署書楹帖悉稱采薇子知君爲前朝遺逸不欲
以名氏見也迺感而賦弔曰

昔

眞人之撫運合四海以爲治畜椒園之鳳麟植場圃以梧櫟或
陳範而就封或抱器而祝嘏天旣眷於有德恪僅陪乎殷夏何
夫子之艱貞獨乃心於亳社石難填夫滄溟木詎支夫巨厦愴
莫拯之危置羌獨全於片瓦遁足跡於空山偶行吟於曠野采
旣匿其雕龍辯終韜於非馬爰客授以自給取無傷於大雅翳
少角之束脩受采蘋兮盈把悲九死於屈平渾四聲於周捨託
椒蘭以寄思磨松煙而闇寫有詩一卷大抵
深恨馬阮也事旣迴於七朝後
人知者蓋寡子辟寇於此都哀遺冢於山下掇故老之舊聞悼
去國之情也桐鄉之祀無人張祿之名亦假或言其張姓
恐亦託詞慕前
史之闕文敢以諗乎來者

公祭胡文忠公祠祝文

代

事功曰勞古人至于與祿祭廟兒有赫國家所以教忠貞在君

上特霈非常之恩故臣子益勵靖其之節惟公七年誕保一德
匡勦肅清江漢之疆明練兵農之政潯陽旣奠潯陽允荒倏聞
厭代而過哀遂留吞吳之遺恨然而大星雖震英風颯然祠宇
落成敢脩歲事雉墉在望依然橫槊之郊垌鶴駕來遊應識借
籌之僚案所冀鑒誠馨德裕國富民霓旌風馬早殲造逆之鯨
鯢桂楫椒漿竊取告充於羊豕尙饗

曾文正公祠成值公生日公祭祝文

作元祀必記功宗古之彝典凡堂屬略如師弟公有前言茲當
奚斯作廟之成欣值申甫降神之吉駿奔走而執籩豆若弟子
之事先師雖鶴化秋江羽儀已邈而象設君室警欬如聆媿無
朱玉之招魂特薦劉宏之餽酒烏呼呼直兵以顧語英爽猶生
拜神影而盡懽福祿來降此日山頽木壞式瞻丞相之祠堂其

欣染潔泉芳若祀坡仙之生日雲車風馬歆此微忱尙饗

忠義局祭曾文正公祠祝文

蓋聞德不見德斯報德之塗匙功不自功故述功之語僊三五
六經厥道一也公功蟠宙合德決靈蠢黷極所屆靡有遺議斯
固操觚之士所同揄揚也某等謂公以山甫將明之才循孔門
博約之訓星雲在望煥乎其文章紱玉雖被眚然於姑射百篇
七十公殆庶幾公一代龍門百世龜鑑赤舄擊擊齒讓於一卷
之師黃閣潭潭心賞及三樂之老支離有瘵飢之感驅黃無伏
櫪之歎台星中圯海內銜悲茲以仲春薦此薄醑有司潔其牲
醴士女輟其工作其德感人如春在物沔中漢上何以加之夫
仁參微管則史氏書勲幸同御李而清士咸遇雞隻酒絮公或
樂胥尙饗

書院享堂李公崇祀祝文

代

聞之厲品節者配里社有道德者祀賢宗尊顯之儀式攸同聲
氣之應求自廣釋奠有合禮文允符伏維李公根蟠仙李秀擢
蓬萊作賦承明蒙仲舒褒然之選持衡江表晉皋陶克允之階
晚承 優詔於

帝廷遂垂大名於 國史俎豆講舍模範儒修顧河海曾辨夫
後先則蘭芷宜同於升薦亦謂儒林一傳與道學文苑而俱尊
師保二官爲公輔侍從所推重稽直道於三代宜晏娛于一堂
請以文慤秦公恪慎唐公文正曾公宮贊朱公侍郎程公桂精
椒漿同斯升饗於戲千秋坊表旣瞻卿月之著明五緯光昌更
卜德星之聚彩如驂有靳俱鳳來儀尙饗

祖奠曾文正公告文

代

惟公大勳在 國盛德浹民旣澹其水火之苗使復被 唐虞
之澤方冀永依於卿月何期遽隕夫台星際茲靈旄之回旋不
勝遣車之瞻戀敢薦膠庠之禮略抒俎豆之忱烏乎圯一代之
長城爲天下惜失萬家之生佛使部民悲所願平流安濟歸洞
庭衡嶽之神福蔭在天照須女牽牛之野尙饗

祭駱烈女告文

烈女張氏上元人於駱爲待年婦未昏而夫駱
繼元死母家欲改字之女乃誓死養姑嗣其家

迫之急遂自縊時光緒三年
十一月十日也年十有六

吾聞古之殉節者大抵有孝有德粹遭兵燹之裁聞禮聞詩卓
爾搢紳之族已受側尊之醴或有共庖之防以故髣髴呼天摩
笄明志從未有慷慨殉義若烈女之皎皎峻節者也烈女生於
寒瘁非有德象之教也身未分明未有燕婉之愛也年甫及笄
家無恆產而乃觸柱求死臨穴哀號終畢命於朱絲甘相從於

黃壤母也不諒人遂云亡嗚乎烈矣某等同在下風仰聞大節特展桑梓之敬薦茲黍稷之馨祈鑒微忱式端風化尙饗

長女哀辭

長女淑莚字伯敬先君子之所愛也年二十一適上元庠生吳榮曾不數月吳客死鄴下女奉姑垂泣守志楊秀清之亂隨姑逃居淳化鎮之徐壩村咸豐六年五月十九向帥營爲賊攻破四鄉民潰女聞變投水死時年二十八其明年四月余始知之自悼薄祔老無子息前以仲女之哀次於心骨今聞此變雖曰正命然自爲人父者思之則不能無悲也因爲楚聲以哀之曰反慈愛之天常兮聞汝投淵之訃也久祈禱於社鬼山靈兮乃死之速非福之祚也捐恆幹以復太虛兮汝之愛非汝之惡也豈汝德之見絕兮緣遭命之故也汝蕢子而靡依兮吾蹇劣莫

汝顧也夫弟之義而困阨兮烽火迫而强暴可懼也雖饑寒勞
瘁之如飴兮嗟流離于有菟也悼王孫之裸葬兮聞河土爲汝
墓也離魚鱉卽螻蟻兮匪獨汝之遇也溯大禍之權輿兮吾迂
拙以鑄錯也韋良侶之欸切兮弗載囊而遵路也旣微服而宵
遁兮徒闢門而哀訴也悲汝羈於幽樊兮十口質而莫遐驚也
登山臨水而望高城兮哀二雛之錮也儵辟地於徽谷兮逸小
鳥之公嫗也翳山林而飲啄兮寡鶴不知哺也置弱植於湯鑊
兮忘無告之啼諱也贅疣於兩姓兮知欺虐之難數也茹荼蓼
臥荆棘兮不忍代爲思寤也殞澄淵其若醴兮惟正命之可慕
也彼蒼醉而悞悞兮庶馮夷之可籲也曰余淑慎以好修兮少
耽精於紺素也羌耆古而非今兮將斲雕華以返淳固也飫糠
覈曳練布兮屏綺紈與寶璐也守庭訓之直摯兮顛沛不改此

度也閒諄讓於時之人兮亦愚質之秉賦也方結縞而事人兮
齎賢雄之見賻也厯浩劫於強寇兮九死不之怖也絜身以完
節兮痛有父不能晤也陽侯之仁惠兮指孝娥爲之傳也魂歸
來而無歸兮更何問乎封樹也在生不恤而死見哀兮徒楚些
之賦也衣藻苔采梲實兮余多慮之錮也魂氣無不之兮謁汝
祖南城淮步也訪汝妹於清涼之麓兮何同罹乎此數也吾衰
病其弗久枝兮歎異方之旅厝也菁華竭而悲填膺兮非丹砂
所能駐也縱山川之糾繆兮余之來其何暮也吾無以仰慰慈
父兮豈徒汝之失拊也亂曰飄風西來折葦荅也淫雨彌月熠
耀消也伊寡而弱難永朝也非無父母不之招也食指旣眾道
迢遙也蒙難堅貞壽非夭也冤氣盤鬱激夜潮也下際重淵上
九霄也化爲精衛翔沉寥也然卓礫蚩舞且謠也甲作雄伯健

以跳也拉幹抽肺賊骨燒也恆河沙劫念莫消也

仲女哀詞

次女名淑黃字仲循生於道光壬辰年六月二十四日生之次
日先君子棄養年三四歲病目及瘰癧者數載見者不能堪未
嘗醫藥飲食之惟閉目獨坐誦書自爲樂出痘時醫家試用珠
黃不之與也痘後亦絕不調補然自幼知讀書畏余特甚余始
憐之荷長知孝友余家儉素無絢綺金翠之飾蔬水外無雜食
又不常得肉女得輒不食葢留以奉余而不知者以爲齋也余
授以五經尤熟左氏傳日與長女互隸左氏事某公某年爲戲
片白中饋縫紉與眾同無以異也余爲但雲湖都轉纂通鑑地
理母籤修其名義使與長女檢輿地書余得以省目力丁未之
夏室人率余客揚州急歸先慈又見背余念此女尙未字人甚
憂之或爲余言范氏子者因許字之原議以己酉歲三女皆于
歸余尙平願畢得以爲間雲野鶴故預自輓云料理招魂孤鶴
倦輓過遭命萬牛難蓋余又多病也歲己酉或爲余作緣繼取
吳興沈氏是年長女三女皆出適吳氏而范氏不言迎余亦
以室有繼母無須急急也庚戌余南宮報罷歸而長壻卒於鄴
間因耗余痛甚時三壻尙就傳未得力願仲女尤覺可憐女在
室勤瘁儉樸無華飾亦不求浮藻聞范氏貧亦不以介意然每
學使者案發其壻無名輒黯然神傷不食者累日與繼母居頗
無閒言咸豐三年正月友人胡君邦華勸余避寇績溪余以書
籍繁重山路不能致因辭之而繼室以爲爲此女也始加詆厲

城陷誚讓范氏曰甚女聞輒心傷六月杪幼子棄疾傷其後母
痛其子也則遷怒并責之後母姊陳在余家撫一女鍾愛之甚
視仲女猶婢虐使之日夜不息陳又唆之女時年二十二矣不
堪其暴自傷無親始立志自戕遂夜露宿地下風露滋甚或兼
日不一食形神俱亡自後其後母思其子則詈之爲賊婦役則
詈之憤其病不能動作則詈之日夜思與余一見不可得延至
九月初十日
辰刻遂卒

聞之苦李之枝必無甘實秋荼之苗詎入盛饌況乎負創瘁
更驚烏號之弓戴德文禽忽入鴻離之網固知竭澤以漁潛鱗
同盡燎原而火嘉植先焚理有眾著本無足怪至迺止樊之羽
絕意飛鳴在林之葉銳志搖落載求鞠窮言之轉謬非無薇蕨
味之弗甘是則昌黎暴下幾同所取之災司馬速朽反成本來
之志此殆將拊膺爲厲被髮訴天者矣余五福道窮六沴駢萃
初取南陽君淑愼端慙生五女一子存者三女繼取吳興君生
二子而存者一乙卯九月三日又殤卽葆鼎也原夫左家閨訓

本自習書謝傳清德偏知憐女南陽君之病也蒙飢驅浪遊席
不暇煖凡夫井臼縫紉之瑣書疏筭之事皆諸女任之迂拙
之訓恪守於余木僵之質頗儀其母性安夷險惡聞執殤之談
識洞幽元堅持無鬼之論濟尼之踪本絕紫姑之上何嘗秀此
士風破彼閨見先慈蘇太孺人親加教督母穿於古窮元凱之
篇綜覈所止習商高之術釵無刻翠折簪以笄衣有結鵲澣葛
爲表烘桑而孜孜爭往食蕭而呦呦相呼雖鷓鴣之卒瘡忘鳳
皇之如我此則諸女之所同而非余懷所獨成也仲女幼而多
病秉質異人孤吟次室而非憂魯女之葵家有禁方而不求鮑
姑之艾茹素自足在母不憂時佐槃匱尤深婉嫕故蒙鳴鳩之
養雖一而嬰武之憫獨深者此也及夫妖賊西來城隍不守鑒
此兵燹累經句瀆乃人之死而生繩再懸而再絕終以春華

失榦有露不榮秋籜離根無風莫隕爰偕後母于時處處情本
隔于肺附生遂等於贅疣旣燼叔倫之笥恐破樂昌之鏡道韞
天壤之歎卽非素心德曜偃蹇之傷乃有今日赤繩雖繫拜君
章以何期黃巾未平悲衰翁之無計羊舌無宗子季旣沒鼠膽
亦累我辰安在於是決脊之杖代受不辭禿髮之管在私不執
蓋已蒿里百步趨之若驚鳩羽一殘甘之如飴矣夫何衣蘆之
愛旣殊芸瓜之杖屨及烈烈赤日晝暴於閭門淒淒繁霜夜臥
之下地寒溼所漬骨爲不立府藏繼潰色乃成灰而猶一羽不
舉譙賁者萬言跬步難移匍匐者數里中夜自擣欲告無親窮
秋來省沈痛永訣聞其展轉牀第悲啼嗷嗷荷荷雖呼勺漿不
給飲食置叔孫之个朝夕詈女嬃之砧陟岵而一見無期伯姊
則終身已矣遂以咸豐三年九月十日卒於家嗚呼哀哉鬼門

重竊眞香不靈義轡扇炎茲竹失蔭巫咸山下詎留意於招魂
韓康市中亦何心而買藥王孫裸葬難求三寸之棺若敖餒而
誰薦一盂之麥聚衣之製莫剪紙錢之贈未聞郵亭夜哭行客
爲之不安窮山骨寒女孀知其無託遂使聞履霜之操嚴父拊
心過舒姑之泉歸魂飲泣哀投兔之莫先倣金鹿以摛詞其文
曰

哀凶禍之鍾吾躬兮女睂顰而折天好方而惡圓兮履忠信信
於物表不辯給巧詐以御時兮此於法有死之兆觀衆生之乘
化兮生勞之而死息之惟狂獄之累囚兮罹折辱而罔辭聞喑
喑而縲絏兮非其辜之所宜般紛紛而多尤兮洵三命之難知
念女冤鬱而遘閔兮詣太卜爲占繇曰二女不同居兮蜚則觸
而鵠闕陰慘刻以枝毒兮故康強而福畀資婞直而率常兮犯

天忌而罔右巫咸聞而垂閔兮發歸藏爲求占云毛裏不屬兮
索字於闔闔初吉終凶兮水竭而火熾申危重安兮參與商而
匪鸛思舜閔之不幸兮及祥覽之辛楚彼井廩之艱危兮未殺
身於險阻何遭悖之殊兮惟一飛而一處資筭屐使事人兮詠
碩鼠而去汝違嘉言以求禍兮思婉孌之成人倣隱之之牽犬
兮御百兩於冬春彼延陵之碩彥兮旣三周於朱輪諒范睢之
單寒兮信誓重以申申嗣吉射之寒盟兮非初志之所慕烽火
倏其照罔兮惡申人於行露執常道而不變兮是亦殺身之具
不徇俗而徑情兮迺學乎余之故長眠而不醒兮夫復何言藁
葬無棺兮遺贈何存沒安默靜兮生含鬱冤魂雖饑苦兮死母
與溫亂曰狂飈之振罔弗墜也巨礮之發罔弗碎也慈父雖惠
莫用愛也狡詐巧佞行無礙也機械相契弗鳴吠也傾貲助之

河周漑也愎諫章卜自憤憤也九原可作泚顏對也觸境哀感
无弗悔也引虎乳子莫之貸也誓言飾非徒百喙也操觚紀實
自怨艾也

汪梅村先生文外集目錄

新建江甯府學文廟上梁文

萬壽宮新建謝定星文

新建文昌宮謝定星文

新建兩江督署謝定星文

督署花園完工謝定星文

府學文廟安位告文

府學崇聖祠安位告文

上元江甯兩縣學文廟安位告文

縣學崇聖祠安位告文

武廟告遷文

武廟後殿告遷文

武廟安位告文

武廟後殿安位告文

倉聖祠安位並附祀諸賢告文

賢良祠祀陳恪勤張清恪二公告文

名宦祠告文

曾文正公崇祀名宦告文

鄉賢祠告文

忠義孝悌祠告文

十三祠告文

上元節孝祠告文

江甯節孝祠告文

顏魯公祠告建文

顏魯公祠安位告文

大程子祠安位告文

上元廟新建明道祠告文

方正學祠告建文

倪公祠告文

汪文毅公祠告文

一拂祠附祀鄭雷二公告文

顧亭林先生祠告文

顧祠附祀諸賢安位告文

惜陰書舍祀陶文毅公安位告文

向張二忠武公祠告文

鍾山書院享堂告文

至聖誕辰祝文

至聖誕辰後殿祝文

至聖升遐祝文

至聖升遐後殿祝文

武廟祭文

改遷武廟祭文

文昌宮祭文

火神廟祭文

八蜡廟祭文

鍾山龍神祠祭文

賢良祠祭文

名宦祠祭文

鄉賢祠祭文

忠義孝悌祠祭文

節孝祠祭文

十三祠祭文

先賢祠祭文

表忠祠祭文

湘軍水師昭忠祠祭文

金陵官紳昭忠祠祭文

昭忠祠後裔祭文

金陵婦女貞烈祠祭文

貞烈祠後裔祭文

景公祠祭文

周公祠祭文

陳公祠祭文

汪文毅公祠祭文

祭曾文正公文

曾文正公祠祭文

曾文正公生辰祭文

忠義局公祭曾文正公文

馬端敏公祠祭文

祭舊僞宮厲文

湘軍陸師昭忠祠祭文

補遺

沈文肅公祠祭文

補遺

汪梅村先生文外集

江甯汪士鐸

台山新建江甯府學文廟上梁文

同治五年五月十二日

竊聞惟天爲大王者因山以升中惟聖憲時賢侯建學以造士
蓋美報先求其稱而善俗在探其原金陵府學本胄子之舊基
江表兵戈遂廟貌之掃地逮鱣鯢之就戮已芹藻之俱荒將欲
崇德而象功於以仰觀而俯察期博厚高明之合撰爲卿士庶
人之大同爰就台城經營禮殿萃虎踞龍蟠之秀寫蛟宮珠渚
之材冠山抗壑丹碧四照於西州耀日垂虹棟宇一新於南國
被唐宋元明以降徒侈宮觀之名南唐曰紫極宮原唐之舊也
宋元曰天慶觀明曰朝天宮
惟車服禮器之堂始擅江山之勝伏願生申誕甫緯武經文發
名山顯位之輝光擲宗廟百官之美富爲時養器合德行言語

政事文學以匠成在泮獻功將太平丹穴空桐大蒙之來格
上梁南對天印山和風麗日霄漢間兒郎偉多士品峻不可攀
上梁北帶元武湖山平水遠周城隅兒郎偉多士高文輝皇都
上梁東翼蔣陵岡祥雲瑞氣凌青蒼兒郎偉多士紫綬紆金章
上梁西接翠微亭崇墉雉堞如張屏兒郎偉多士勲業垂丹青
萬壽宮新建謝定星文

伏維北辰居所近太微天市之間洛邑開周卜澗西瀍東之地
故建邦必先正位而圖大端在宅中欽維

萬壽之離宮實爲九天之間闔卜茲吉壤仰賴神庥襟青溪而
帶淮水譬漢家滄瀾之流左鍾阜而右石城邁商人景山之秀
勾陳環拱帝座尊嚴聚四方車馬之攻同合萬國衣冠而瞻拜
博也厚也高也明也爲億萬載有道之基手之舞之足之蹈之

遂大小臣無疆之祝蠲茲清酌敬謝明神尚享

新建文昌宮謝定星文

緬維元公定禮樵燎展敬於列星爾雅釋名暇沈下逮於布露
其後梓潼之降蹟豈必元命之苞符因開鳴鳳之祥遂若勾龍
之配近躋中祀宜有崇祠戴筐仍傍於帝車大籙專司夫文籍
在星宮固門牆之峻而大神使階級以升凡茲魏煥之瞻觀悉
仗英靈之呵護此後章身華國藻采必溯夫匠成譬諸采桷棟
梁楨幹胥資於器使敬申薄醊上荅神庥尚享

新建兩江督署謝定星文

同治十年十一月十九日

在天成象十星揚營室之輝惟帝念功三府重司空之選興造
苟關於起部馨香必報以明禋惟神位尊元武績懋明堂平水
土之隆窳役般倕於指顧埏陶品物締構雲霄茲以節鉞之崇

階還鎮蓬瀛之福壤潭潭相府旣已右城而左平秩秩斯千悉
仿魁方而杓曲非云工巧知賴神庥惟羣玉之構雖新而平泉
之工未竟桂旗孔蓋更乞靈綠野之堂匏器香泉先展敬黃流
之瓚尚享

督署花園完工謝定星文

竊以旌幢有託馨香已報於明神林木須培名節再勞於
所以鳩工協力鴻構加崇旣開東閣以延賓更治南樓以舒嘯
抗山浚壑疑九地而九天拂石臨流便一觴而一詠念昔開天
詩客集號輞川元祐賢臣園名獨樂瞻懷故里未有新巢何意
午橋得於甲第此蓋 天恩優渥 三朝垂知遇之榮
神貺昭垂十匠殫技能之巧俾其退食得遂優游感激下忱彌
殷中謝惟有常懷相在俯念民勞預儲楨榦之材兼采芻蕘之

論撫松竹而思君子欣逢棘翼之落成樹椅桐則恤農人願效
桑田之夙鵠黍稷載薦丹青弗渝尙享

府學文廟安位告文

自昔建邦之立學所以善俗而明倫然惟巍我堦壇之區始配
博厚高明之德緬金陵之省會實江左所具瞻自嗟周道茂草
以來遂深城闕子衿之感今者雲雷締構日月光華爰契冶城
建茲禮殿左龍盤而右虎踞雖遙東山泰岱之高而秦淮而負
長江庶幾洙泗泉林之勝是尋是尺竭二三臣畚揭之勞不吳
不揚康七十子琴書之坐敢循遷廟之典聿新作主之儀奇音
冀發乎金縢聖跡請安於石室望文昌於北極彩筆定騰牛斗
之光卜至道之南來宮牆同仰象環之度工祝致告繁蘋可薦
於鬼神寢成孔安禮樂尙俟諸君子宮牆在望瞻仰式殷敢告

府學崇聖祠安位告文

昔稷契膺賢聖之姿輔唐虞之盛殷周承運郊禘稱隆而諸王勳伐遞傳明德世濟誕育至聖師表帝王綿延二千餘年光被十八直省溯本源於水木合血氣以尊親援昔證斯懿哉盛矣今者陽春布令函夏銷氛寢成孔安奉迎神御北瞻鄒魯衍道統於江淮高接星辰俯文昌於斗極所冀秩秩新廟旣殫孔碩孔曼之觀赫赫王靈載毓有爲有守之士神之格思惠此南國尙亨

上元江甯兩縣學文廟安位告文

同治十年二月十四日

天子化民已致隆於大禮大樂諸侯建學必展敬於先聖先師絪縕肇序之移貞始景祐之日卜年已踰八百善俗不異五三而龍藏以爲泮池左蔣阜以敷講席屬當劍戟之歸聿觀楹桷

之新特展儀於有司敢告安於從者所冀水南水北同霑木鐸
之教思江草江花益發杏壇之文藻祐茲時棟蔚爲國華

縣學崇聖祠安位告文

惟玉元鳥衍祥瑞麟駟慶聯五聖以龍袞肇百代之虹書茲當
寢廟之告成敬冀神保之來格以天下養承祀徧海陲山陬爲
百世師成教於慈孫孝子肅繡黍稷式妥几筵以先賢顏氏先
賢曾氏先賢孔氏先賢孟孫氏配尙享

武廟告遷文

同治八年五月十二日

在昔江表初平河朔未靖雖兵車之猶動懼俎豆之闕如聊營
几筵以妥旌節借展三獻已歷四年永惟湫隘之居弗稱巍巍
之德謀及龜筮別構鴻圖殖庭覺楹稱詩則新宮可管翠旌孔
蓋逸禮存遷廟之文故實恭聞牲牢以告

武廟後殿告遷文

惟公世儲明德載統大賢恩緣義隆親以子貴敬惟神明之御
宜遷壞塏之居出祖於庭式聽鸞鏘之協度奉盛以告敢忘驪
唱之有文北望崇祠恭延雲馭敢告

武廟安位告文

惟神忠存蜀漢功莫山河旣德大而勳崇宜堂高而宇邃爰作
新廟之翼翼敬安儀衛之祁祁東連龍廣之原近俯甃籠之阜
崇規式煥神御再遷猗歟初卜澗水又卜瀕東相宅上原於洛
誥夷實城父析實白羽大誼亦本於春秋尙享

武廟後殿安位告文

惟公氣貫河山德鍾麟鳳稽古省南宮北宮之制於時有三廟
五廟之儀降福默仗於神威趨庭特隆夫禮殿緬前朝之崇學

改作有類於新豐妥禋世之明禋每懷無忘於故絳尚享

倉聖祠安位並附祀諸賢告文

作者謂聖造書契而易結繩祀以報功薦馨香必崇祠宇粵若稽古咸秩無文原六經載唐虞以來而三皇之謨烈遂掩况雨粟鬼哭之荒遠故獸番鳥跡以同湮在古聖又工察品苞符既啟萬禩之文而吾儒後海先河遵豆宜告二仲之絜禮雖釋菜儀肅薦繁於戲昔藏孔壁闕殷盤周誥之前光今賴許書識尉律學僅之往事敬羅賢哲同訂古初請以大篆之史籀隸書之程邈楷書之王次仲草書之史游小篆之許慎配尚享

賢良祠祀陳恪勤張清恪二公告文

惟二公以清慎勤之實心任江淮河之重寄正已率下盡力宣防然其勲伐所垂猶有企及之彥所難能者秋霜避嚴夏日可

畏羔羊喻其清節解牙觸彼僉壬以猛濟寬遂階郅治故人肆
詆毀 天爲昭回且 詔江表之叢祠冠以首善之顯號此
世宗之特旨非他人所得幸邀也叔灰無餘享堂重建亦以祇
若 成命敬述前徽在二公清忠幹濟宜隆千秋俎豆之儀而
後賢立懦廉頑更深百世惠夷之仰尚享

名宦祠告文

鄱郡負山襟江習俗輕矯仰賴大賢之蒞始移下里之風爰溯
炎劉迄於昭代二千餘載九十五人畧於故簡之殘詳於所見
之世召伯之棠雖剪樂社之榆斯存幸逢泰運之交共慶鼎新
之政敬妥靈馭上垠暨宮於戲緬疇昔之風稜不敢冀一錢之
選際今茲之月吉爰用申尺帛之儀田疇子弟諸公之遺愛弗
諼章甫衮衣國人之頌聲如昨尚享

留文正公崇祀名宦告文

惟公功彌六寓德沛三吳旣騎箕尾而遐征徒望峴山而隕涕
茲以士林之追慕謂宜聖人之與居仰奉 恩綸式崇特祀於
戲憩棠留愛昨瞻丞相之祠堂釋菜有儀今榜文翁之禮殿循
宮牆之萬仞聲聽金絲仰袞舄於千秋禮隆俎豆洋洋泮水神
其樂胥尚享

鄉賢祠告文

古者飲射之禮賓介咸謀於大夫都邑之成明清亦溯於先正
矧吾郡虎踞龍蟠之地宜代有鸞翔鳳翥之賢珽笏留於勲猷
巖阿發其光彩顯晦或殊於朝野名節皆昭於丹青高山之仰
久殷瓣香之敬斯在今者燕過朱雀空對草花鶴返遼東惟餘
城郭無復釣遊之所況尋弓冶之遺於戲故家文獻卽同杞宋

之無徵新廟几筵庶幾衣冠之憑式後學曲敬先生式臨尚享
忠義孝弟祠告文

惟靈備鍾開氣允植人綱大節從關比而游清芬繼夷齊之後
祇服厥父華黍吹笙克恭厥兄唐棣傾豆信爭光於日月宜永
祀於春秋茲當鄉校之新聿肅溪茆之薦英靈來格明德爲馨
尚享

十三祠告文

昔吾郡之全盛也祀事有恪咸秩無文上溯成周下迄昭代祝
史紛於巷北翼轅徧於城南或特侔紫極之宮或分布長干之
里自豕蛇之薦食等鴟鴞之毀巢將各鼎新殊乖節儉緬石室
之萃羣彥比滄浪之集名賢故實可徵新宮聿啟粵若簪裾之
先正暨於纓紱之名臣精忠偕龍比而遊大孝接曾閔之席同

堂異。以辭猶隙之譏合。漢通微實有盍簪之慶。所冀肝鬲攸止。鍾毓有靈。龍潛蠖屈。占五百里之聚星。鳳翔鴻儀。兆三千人之同德。尚享。

上元節孝祠告文

昔范史著微美之典。中壘重賢明之稱。義隆家人。匪徒貞烈。然而陽和之嘉木。不易風霜之勁草。益難克完。夫婦之倫。始廣周南之化。某備官江介。尤敬女宗。嘉爾等冰雪之操。實後世珩璜之槩。祠宇新建。芼菜告虔。於戲誦詩。窈窕爾信。無慙於女師。學道弦歌。余敢不勉於君子尚享。

江甯節孝祠告文

士委質而事主。女出室而事夫。禮雖殊科。誼歸一致。故孔子刪詩。著共姜之節。修史紀伯姬之災。彤管有輝。棹楔斯表。爾等境

殊榮悴業異士農而甘以百年未盡之軀殉此一醺終身之禮
堅卻榮觀之燿願守苦節之貞風教所型頑豔同感吾以薄德
承乏此城屬崇宇之落成薦少牢以展敬庶幾愼此遵豆歸遺
泉室之姑嫜宜爾于孫悉備 熙朝之楨幹尚享

顏魯公祠告建文

惟公精忠貫日大節凌霜始建義於平原早沈寃於河隴屈金
發弩硬黃留海內之珍斷脰陷胸化碧壯中朝之氣今茲祠堂
之建實公符節之邦放生之陂澤已非石柱則雲煙其化靖安
不遠展乃祖之松楸梁社久墟慰昔年之薇蕨此地有崇山峻
嶺庶幾化鶴而來遊以能保子孫黎民敢不停驂而進爵尚享
顏魯公祠安位告文

惟公雖籍瑯琊實生建業學並窮於二氏氣直壓於萬夫識劉

展之邪謀徙薪浙右折希烈之狂焰蛻羽淮西遂令信史寫忠
英儒仰則游棲真之館警欬如親過放生之池襟期可挹今也
句曲之杏梁已邈鷺峰之石柱云亾爰構茲堂以康先正北連
幕府松楸之敬非遙西俯清涼竹柏之懷斯在倘白鶴能歸於
華表庶朱鳥可食於石城既可師可法於百寮必斯愛斯傳於
庶士嗚乎山高水長同仰尚書之清節松貞柏悅如瞻魯國之
先賢尚享

大程子祠安位告文

惟夫子書傳定性教在識仁得微言於三五六經之中接聖道
於千四百年以後絕學倡於洛下遺愛留於江東兵燹既清靈
光獨在甘棠勿伐修曾子薪木之堂澗藻揚芳倣文公竹林之
祀茲當落成敬將享事重瞻化日薦清酌於堂階如坐春風聆

雅言於几席尚享

上元解新建明道祠告文

君子所過者化不卑小官大儒以道得民有辭永世惟郅治以
三代爲法而論政以十事爲先迺精義未展夫睢麟服官僅儋
於丞尉睠此上元之解曾紆有道之車渥惠同被於晉城遺愛
豈後於桐邑茲以聿新廟貌重薦豆籩瞻仰几筵如親謦欬有
爲若是先生誠百世之師式禮莫愆後學敢四字之媿

方正學祠告建文

惟公學明王道身任太平將輓宋元之頽綱復致唐虞之盛化
顧以奇才未老遽賈誼於長沙國步斯艱擢秀夫於海嶠陶穀
十行之詔素恨諸臣要離九族之刑遂湛冤魄使風雲變色宮
門之衰絰徒悲與日月爭光高廟之神靈可鑒何期忠骨已化

荒邱一坏之土雖存八尺之碑安在昔者父師宗袞周主封其
壘岡王蠋布衣秦人禁之樵采恭聞故實況鎮茲邦爰命工師
敬培佳域繼汪應湯顯蛟之軌俾梅岡木末而一新開夷惠之風
冀懦立頑廉於百世德輝所仰黍稷匪馨尚享

倪公祠告文

竊聞君子之仕義雖行於當時而仁人之言利且溥於後世在
昔鷁首之成本有魚鱗之冊彼旂衛所享之渥澤皆閭閻共竭
之脂膏何期指鹿之徒妄陷瞻烏之屋惟公慈祥德普鉤稽心
精書成前代若鑄鼎而象神奸福祚興朝遂燃犀而燭水怪
流澤既遠奠醑宜虔蜺幘雲飄蠹政永清於駕部椒漿桂醲蟻
忱期鑒於雲車尚享

汪文毅公祠告文

惟公麟臺視草鶴籙紬書慈谿流閭悌之仁江表建保蔭之策
既而渡河莫堵蹈海何辭型于則談笑以從造次而尊卑有序
迺以下臣之名節遂膺

聖主之褒榮今幸遺構之存爰潔獻尊而薦夫死忠妻死節殿
有明一代之綱常地之義天之經合名山千秋而崇祀尚享
一拂祠祔祀鄭雷二公告文

斯文未墜運會斯權粵稻

聖祖之季年逮於

高宗之初載陸王之風寢息程朱之緒昌明有若侯官之鄭公
與夫甯化之雷子並宗省躬而守約不敢尚口以矜人經筵雖
湮於草萊徽猷尚紀於珉玉謨篆二賢之版位祀諸一拂之崇
堂嗚乎兩公馨香之德沖淡之文多士安能幾及而其崖岸之

高冰蘖之素後學實切景行七閩匪遙瓣香斯在尚享

顧亭林先生祠告文

先生綱維人紀冠冕儒林雖值無諱之朝尚乏有司之祀茲地祠貽司馬鼎近鍾山松柏之節不凋禾黍之悲已久緬昔滄波無極猶思精衛之填鳳鳥已儀猷下杜鵑之拜山河不改日月其除至於去國羈栖垂心著作音分八類併二百六部唐韻之書俗問九州纂一十五省肇域之志由聲通詁陳古刺今不僅齊魯之讀攸分山川之典能說已也今者哲人雖萎流風猶存西瞻華岳難尋山史之舊堂北眺慈仁請續子貞之故事先生在上後學所師尚享

顧亭林先生祠附祀諸賢安位告文

蓋聞石室流芳名山有不朽之業少微耀采處士本逸民之心

惟先生百世儀型三仁孤跼勁節寡偶絕學無倫 國史冠於
儒林慈仁崇以秩祀雖薪期傳火而德竟無鄰將斯文之在茲
亦來緒之莫紹夫年譜待車張而訂遺書賴毛黃之箋上測高
深咸竭心智今茲薦馨之典敢忘侑食之人爰羅邦域之羣英
譬負門牆而執贄敬練今日敢告不蠲於戲高矣美矣難窺先
生采鑒之衷仰之鑽之庶遂諸賢化蟬之願荃宰旣寄私淑孔
多尚享

惜陰書舍祀陶文毅公安位告文

惟公開濟之略祀於 大烝康乂之謨詳於 國史俗士識小
里言載葢特其好古之苦衷暨夫作人之雅愛所思不遠詒經
導厥先聲其在于今求志衍其逸軌海內聞其風者猶將尸而
祝之况西京熾盛文翁之石室猶存北海清夷鄭君之禮堂如

故敢新粟主式薦松醪嗚乎九原綿邈名臣亦惟隨會之與歸
五經紛綸後賢其繼大春而特起仰瞻碩德延企方來尙享
向張二忠武公祠告文

疆場揚致果之勳必資軍力 朝廷有褒忠之典特重臣心惟
二公懋膺專閫將率同袍奮藜藿不采之威作蘇常保障之
氣功在民社已歷歲時迨士馬失於飽騰而東南遂致糜爛勛
業雖枉英風愈標今采遺黎之公言爰崇作廟之特禮用薦常
事以酬豐功嗚乎易名鉅典 九重旣隆綸綍之 恩降福孔
皆列郡同仰弓刀之烈廣牡在御毅魄式臨尙享

鎮山書院享堂告文

以道得民若古有訓立學釋菜於今不忘緬自古在昔之年虔
羣公先正之祀誼在必告禮帥其初惟諸先生因材而篤皆身

教言教之有方而五六公論說未泯悉經師人師之兼備宗風
罔替舊雨相逢休哉新啟崇軒古今人教澤相望敬妥神御先
後聖道揆本同敢告

至聖誕辰祝文

惟先師德參天地道述唐虞集羣聖之大成垂百王之治法茲
者鄉校州庠樂備禮明鸞旂泮水幸瞻文教之暉麟紱昌平欣
值嘉祥之會思樂芹藻敬薦蘋蘩所冀中天毓聖昌期既萃於
陬鄉間氣鍾靈餘慶分衍於江表尚享

至聖誕辰後殿祝文

維王世家篤慶宗袞承休鍾毓厚于子姬發育光于日月溯嶽
降中生之會邁流虹大電之祥經陳庚子瞻拜同懍於師資義
本春秋齊聖不先於父食敬陳牲醴用展齊明尚享

至聖升遐祝文

交道薄蝕日月之體無虧氣化乘除聖賢之德不變自梁木泰山之壤歷漢宋元明以來尼山之道愈明聖王之宗愈謹家塾鄉庠里序師法無間於河山詩書易禮春秋輟講今嚴于子卯敢告充備式薦馨香尙享

至聖升遐後殿祝文

昔周公之興積德累仁者十五世軒轅之聖畏神服教者三百年今自先師撒瑟之期逮於下土設奠之日年踰百世祀徧九州哀榮已極足慰五聖聯袂之心牲醴告虔勿悲兩楹坐奠之夢明德匪遠奉慰以深尙享

武廟祭文

惟公英武天授忠敬性成正統能扶識冠乎陳壽司馬之上遺

經知好學參乎言游卜夏之班大節遠照於吳邦秩祀遂隆於
盛代自潢池之盜弄致神馭之播遷茲當日月之重明改卜堂
基而襲吉春秋之義大一統魏吳之草竊何存文武之世有六
駿貔虎之典型斯在闕宮有血大樽是承棖桶載瞻弓刀如在
所願四郊永謐暨皮服卉服而奉琛席幾三獻告虔羞羊俎牛
俎而進爵詔三有事於萬斯年尚享

武廟改遷祭文

惟神功存江漢學本春秋忠義旣冠於人臣靈祐尤顯於
昭代在寶鼎三分之日蜀吳尚存疆域之嫌而金甌一統之時
華裔共仰神威之肅屬龕平於故治爰考卜於新宮東連驃騎
之航南鄰杜姥之宅以妥牧圉藉薦豆登修廟木法諸麟經廣
庭期待夫虎衛所冀乘風馭電威靈遷御於仲春尚祈鑒矢戢

戈懿德徧敷於時夏敢以定宅昭告明神

文昌宮祭文

惟神光鄰樞極暉炳薇垣六星聯載弁之珠八坐麗旋杓之彩
宜薦牲而奉玉迺祐福而降祥郅治無爲素蒙嘉氣茲修脗飾
以迓蕃釐竊謂華實之兼端以孝友爲本今燿火方隆於標燎
咸豐中始而干羽卽格夫甫頑大盜是知翊昌運而握泰符旣
臻成象在天之瑞能文章必蓄道德式賴因材而篤之神尚享
火神廟祭文

惟神稟靈南極毓德離明秩祀昉於陶唐世胄紀於顓頊處商
宋而祲祥用弭食心味而出納以時罔有鬱湮故迺隆福茲舉
時祭醵火應躔瓘玉瓊敢愛鄭僑之寶以紓災榆柳柞櫓請
援鄆子之言以救疾惟神英明歆茲黍稷尚享

八蜡廟祭文

惟神熙績虞廷奠功漢臘論譔自伊耆以後索享合人物之靈
茂矣美矣絜黃冠素服以祈年使之報之聚后稷神農而祭種
茲蠲品物值此季冬祝坊庸表嘏於曾孫進清酒騂牡於田祖
去螟螣去蠹蟻告爾大神之來歆如茨梁如坻京食我農人而
介福尙享

鍾山龍神祠祭文

同治七年正月二十八日

紺轅縹輶泰始之藉句畿元幽青皋攝提之崇先穡雖決渠而
降雨賴尺木之興雲惟神降德蕭梁毓靈鍾阜灌溉周乎江表
汎灑徧於郊垌爰肅祀儀特隆壇墠茲展歲事敬薦犧羊奠椒
酒以停鑾祝稻梁之長畝大旂閃於列缺靈輿駕於飛廉所願
菰穗穰麥芄芄霑霖之仁查下橫塘翼翼慶倉箱之積尙享

賢良祠祭文

惟靈勲銘竹帛德洽茅檐 帝曰夏臣史稱賢佐旣傳珽笏之
遺愛遂蒙 綸綍之崇褒明禋咸秩於神京將享下逮於江表
茲當春仲歲事聿修自堂徂基洗爵奠俎於戲畏神服教故事
曾留石相之祠崇德報功數典不後樂公之社徽猷未沫福此
兆民尙享

名宦祠祭文

惟諸公崇勲在 廟懋德濟時上殷已飢已溺之懷下遂我爲
我生之望養民惠使民義造福於牛斗之區綏斯來勳斯和歸
神於箕尾之上今者留子之麻雖種太尉之柳何存敬以仲春
肅陳祀事召父杜母允宜俎豆於桐鄉蕭規曹隨願繼綱維於
棠舍明德在望來止庶幾尙享

鄉賢祠祭文

公等鍾靈茅蔣勵德珪璋功伐紀於旂常清芬流於鄉井今者
過過墟里上仰音徽舊德之閎闊雖遙先正之典型可溯斷碑
遺礎留千年翁仲之悲乘風載靈作羣賢衣裳之會維茲春秋仲
敬肅溪毛於戲念名氏於前修斷自黃武太興以往肅儀型於
後進庶增龍蟠虎踞之光敬薦瓣香伏惟來享

忠義孝弟祠祭文

諸君庸行克謹大德不踰名不盡譽序之登事不求輜軒之采
而松柏挺其勁節蓼莪廢於讀詩以視簪紱極榮觀之隆竹素
擅宏通之譽顧乃有慚愛日負謗歲寒者窮達固判如雲泥聖
狂亦判如天壤矣收薦馨香以敦風化臣事君子事父祇致身
竭力之二端誦其詩讀其書冀懦立頑廉於百世尙享

節孝祠祭文

昔孔子刪詩於大車錄同穴之義於柏舟存匪石之言衛姜取其異庖申女嘉其速獄凡以厚風俗敦倫常崇女貞而勵婦德也大道雖衰陰教猶謹於是有摩笄之烈於是有墜樓之清於是有朱絲之懸於是有白波之赴咸舍生以取義若悅禮而敦詩班之聖門猶有取也廟在守土敢或忽諸春霜秋露爾室定陳魚菽之筵桂醕椒漿貞魂式鑒牲牢之薦尚享

十三祠祭文

夫先聖後聖之繼作非大巫小巫之有殊當其異代之同符實曠百世而相感今者上自趙宋近逮

聖清占蓋戢於一堂證同源於醕飲聞其風者有山高水長之慕仰其盛者殷松貞柏悅之懷此固祀典之新猷度亦羣賢所

日集
共樂也所冀矢此文德佑我蒸民國多君子比於鄭僑吳札之
聯裾居近聖人同聆性道文章而入室我有先正尚享微忱
先賢祠祭文

昔趙宋當景定之時馬帥爲制置之使謂師表宜取諸曠代而
景行益切於高山爰采至德之聖君迄於端平之參政鴻儀鳳
翥四十二人要惟絕代之賢不必此邦之彥始建祠於青溪之
側繼遷主於晉德之原祀事孔明綿歷七百今幸干戈之定忽
崇俎豆之儀敢告羣英譬諸合祀夫綿蕞可以習朝禮蒞藻可
以羞王公伏冀鑒禴祭之西鄰降鴻釐於南國篤生名世庶繼
前徽尚享

表忠祠祭文

在昔革除之史強名靖難之師而諸公志倦故主目無新朝祝

斷脰剖心以爲常遂湛族燔家之相繼從古忠貞之接慘無此
節烈之如林慨自大盜之興遂爾崇祠之毀茲當清晏爰構斯
堂時值仲春敬修吉禮潔粢鬯之嘉薦展松筠之特操有其舉
之莫敢廢舊井仍居全節之坊後之攬者感於斯新宮竊比表
忠之觀尚享

湘軍水師昭忠祠祭文

惟靈志恢翬極身隸龍驤勵十決十盪之威排九地九天之陣
踐洪濤如砥石飛巨礮如流丸何期鐵鎖之方燒不幸長城之
同壞在靈等忠埋魚腹方偕晉種而涉江而今茲功賀蛟門台
飭爾輸以作廟簋笙迭奏箎管和鳴應出召夫馮夷繁鬣薦於
河伯鯁鯁築觀足慰同袍同澤之心龍壘爲梁更快汝鼓汝弓
之素從此江淮靜謐來享降格於城隅島嶼縱橫有截更期于

海外

金陵官紳昭忠祠祭文

惟靈忠貫皦日氣作長虹既筮仕於危城同捐軀於生冢冤眞
化碧不歸連尹之尸恩荷焚黃難覓王琳之首以及膠庠文士
海島軍人庸書記而銜鬚隸票姚而斷脰江子一死於闕後已
去下流周文育敗於三陂本圖犄角更有情殷桑梓生戀松楸
衛粉社而枕戈綰竹符以守土巢傾卵破卞壺之二子偕亡棟
折懷崩要離之全家俱歿視此取義成仁之節同竭食毛踐土
之愚特搆文軒用綏神馭茲已蚩尤膊解董卓臍然經參合而
傷心弔戰場而隕涕宋相過棄疾之墓叱咤尙聞其不平唐宗
建昭仁之祠享祀以抒其義憤薦茲黍稷保我黎民尙享
昭忠祠後裔祭文

自昔陽九百六之會爰有致命遂志之賢非必敷心胸於
廷無不捐踵頂於鄉里願昔閭諸簡冊之上何意變生庭戶之
閭緬諸靈構禍於危城而商等出亡於僻壤未及同飽爲蟻代
驅狐狸或化碧於他邦無焚黃之殊寵蘇韶之魂入夢王琳之
首不歸春露載濡秋霜戒寒曷勝悽慨念骨肉有因依之感而魂魄無遐
邇之殊禮由情將淚隨俎瀆烏乎難問安否於泉室未服勞事
於陰堂遐不謂矣永無祝哽撰杖之期靈之來兮應識索果牽
衣之素尚享

金陵婦女貞烈祠祭文

昔聖人於春秋錄伯姬之節於國風載共姜之詩猗彼賢媛流
芳中古嗣是劉中壘列之佳傳范蔚宗采入史編咸以淑德之
可欽遂爲陰教之最重嗟爾等生於閭閻遭此閔凶或投蘭芝

之環或赴曹娥之水或飲玉英之藥或歷代后之笄雖爲節爲孝之不同實守義守身之一致茲建祠宇式薦牲牢俾鄉閭傳爲女宗爲朝廷彰其風化嗚呼地名全節尙留匿影之區臺號懷清宜表式閭之敬奠斯清酒慰爾貞魂尙享

貞烈祠後裔祭文

蓋聞池魚無罪次室何哀大厦之傾其下皆摧背母匪之造逆與督師之不才公私塗炭玉石燼灰於時或繩率以畢命或潛淵以爲期或蹈焚燔而不悔或甘刀鋸之如飴或碧血於異地或青燐之夜飛或舉族之同盡或恆幹之不歸此皆裔等之大母生母繼母伯叔母姑姊妹也烏乎裔等雖不孝而幸此旣安旣樂追憶顧復期望我者慘酷之遭如割如灼時維秋矣始進一爵心則箭攢淚徒雨落黍稷卽馨究何補於死者之不可復

作也尚享

景公祠祭文

嗚乎公視君仇若報其私爲知豫讓爲燕漸離刀鋸之蹈如嬰
於飴烏乎昔商王受剖心斲脛史記其惡列于聖經明有篡賊
敢用非刑肆其淫威誅斬忠貞烏乎公處一死極烈極仁後賢
視公西狩之麟華袞雖褒不及公身牲醴雖馨不歆公神公而
有知處此城闕聽南史之筆鄉校之口謂公所遇之主爲何如
人尚享

周公祠祭文

昔者管叔據沫土之邦楊諒興晉陽之甲毀雖敗於骨肉害祇
流於置場從未聞飛燕初來杜鵑不返儒臣循虛名而受實禍
勳戚舍故主而迎新君公以宮僚獨伸臣節嗚呼忠留芹水幸

殊十族之災敬薦椒漿用慰三仁之節尚享

陳公祠祭文

惟皇建極庠序學校之如林以賢得民禮樂詩書而造士公以西江之碩彥作南國之宗師入儒林傳已偕孚遠以濟芳題學政名復繼子雖而鐫石文衡操之七載士論謂宜千秋今當榱桷之興禮展籩豆之敬佑我多士蔚爲國華

汪文毅公祠祭文

惟公毓靈南國染翰西清屬當枉矢之橫飛遂搆虞淵之朝霞公乃從容闔閭整肅衣冠以忠臣烈婦留天地之經爲虎踞龍盤壯河山之氣幸荷褒榮於帝典借表模楷於人倫茲值仲春絜修歲事溯賢太守繕修之後迄余小子蠲吉之辰日月無多風雲如接成仁取義公旣紹美於前賢學道愛人我願徼福

於故治尚享

祭曾文正公文

天眷

聖清日月重光星精垂耀降於南湘邈乎不明卓上紫宮風搏
九萬抑畏翊翊儉德服士權盛不戢井絡之郊洵漢之沚西王
南金作貢

天子銘几箴展

聖人有喜俚佐亂民盜兵潢池驕帥縱之匪怒而嬰公翼
帝命爲簡之師退蒐衡陽迺剋賊止則鉅防逝則奔馬風霆
滿空胸其來下左睨洪都右拂江夏使賊肝鬲慙焉九野士氣
如劍或浮或沈公爲歐治契合于深會有天機拔植高岑眳然
位分見者傾心始迹洞庭喋血彭蠡欽承大符斧賊醜髀益陽

欽之合肥汰之賊有心肝介弟劓之梟巢獍穴燔之膺之瑣兮
遺黎甘雨霑之

帝胙偉烈誓河苴茅公開東閣吐握英豪鱗介在遠懼不敢虢
德量所涵島嶼畢包綢繆百里定奠田植神有秩祀粢有穀食
頌宮用羽澤宮較射國殤甄錄書林畫式萬井皞皞相忘

帝力大福不終鞠凶吾人春相同轍銜恤傳恩聲皆徹天淚皆
徹泉仰瞻箕尾四顧怒焉中國有葵豈止其身

何文正公祠祭文

維公翼軫流彩衡嶽鍾靈學術上契於 九重勦伐下際於兩
戒然射訓狐以靖亂已付班馬之紀言至其三十年簪簪之忠
一个臣休休之度好善優天下之量微公幾託諸空言思賢若
飢渴之誠功宗盡賴其推獎以故中外禔福海寓肅清 朝廷

隆酬庸崇德之恩吏民殷侑爵領邇之禮時維春秋矣歲事聿修
於戲廟者貌也承祀有如親炙之暉神而明之後賢共切頑廉
之慕荆吳雖邈袞焉其徠尚享

曾文正公生辰祭文

聖人可師百世請爲之校德而論功孔子之道六經莫大於撥
亂而反正緬吾黨之得安弦誦賴丞相之淨洗甲兵旣誅四民
而同情請卽一獻以展敬釋奠古禮如弟子之事先先生攬揆良
辰記崧嶽之降申甫溯沔上峴首之墜淚民皆畫象以追思仿
香山東坡之生辰公其跨鶴而戾止歆此魯酒福我吳民尙享
馬端敏公祠祭文

惟公鍾靈河汾保障淮淝爰藩翰於皖山晉開府於浙水衣紫
一品治績簡在於

帝心節領兼圻仁澤徧沾於士庶茲逢春仲歲事聿修烏呼誦
古柏於專祠前惟葛相念甘棠之芟舍世感康公棖桷仰瞻牲
醴告備尚享

祭舊僞宮厲文

汝等同居鼠穴俱化蟲沙雖劫運之使然亦爾心之未靖鯨鯢
旣築烏鳶何仇特以國恩蕩蕩義濟以仁而將率桓桓威克厥
震今本爵建中天之節鉞鎮南戒之河山憫汝蠢愚爰施惠澤
念參合之哭旣先旌以專祠昆明之灰亦宜沃以清酒汝尙強
飲強食若嘯若啼柳車可載幸祈佛法以拯援粉社同歸須感
聖慈之廣大尚享

湘軍陸師昭忠祠祭文

昔金陵桑毒之歲星在牽牛泊於廓清天竈在次蓋歲輪一周

矣其間獲軍殺將慘不忍言所最苦者吾民耳天心悔禍

聖人當陽丞相視師涼公用命譬彼雨洗牧野雷震昆陽奮摧
枯拉朽之威爲掃穴犁庭之舉舊物不失大德曰生然後子遺
之民得以蘇息於是 朝廷隆報功之典萬姓興懷德之思
有來雍雍作廟翼翼封羊繫豕桂酒椒漿羌匪懈於春秋用齊
光於日月奠我 皇極謚爲鬼雄於戲盛哉尚享

沈文肅公祠祭文

惟公三館蜚英九秋表肅老成見於幹練樸忠信於寅僚自朱
芾之式臨靖黃巾之餘孽剛健所以馭下明睿足以研幾在物
無能遁之情察吏鮮浮詞之飾在昔蚩尤旣磔風牧效其猷爲
新莽已誅賈寇展其吏法隨會舉而晉盜去朱治屯而山越安
豈伊異人惟公繼軌烏乎法施於民 恩命旣隆於九陛

祭則受福神惠冀普於三吳靈之來兮享茲嘉德

汪梅村先生文外集